

秀水縣志卷之二

列傳

秀水縣

孝義

明

趙智直德業其道立於鄉里吉士以省親乞歸世居白苎鄉



之秀水橋鄉之好善也木青村有正禾諱光盛德村與

智父四人補其地交作什一餘智建四老堂以娛其

鄉內闈王直爲之記

W
L
53473
冊數
冊數人

許瑞光重輯



嘉興府志卷五十三

嘉興府知府善化許瑤光重輯

列傳

秀水縣

孝義

明

趙智宣德癸丑進士授庶吉士以省親乞歸世居白苧鄉之秀水橋鄉之好善務本者徐存正朱謙光盛德材與智父四人稱莫逆交年皆七十餘智建四老堂以娛其

親內閣王直爲之記

吳志參徵獻錄

秀水孝義

陳昺事母沈盡孝母邁危疾晨夕奉藥裹侍牀褥母忽思食鯉乃循溪岸行聞魚躍聲解衣入水得巨魚為羹奉母居喪廬墓三年諱日記有一鶴從空下馴擾於庭里人繪二異圖詠歌之子孫多馴行孝謹六世孫懿典官詹事

劉志參
袁志

沈本世居永樂里積織起家郡邑舉為萬石長正統辛酉歲饑有詔勸富民賑貸本輸粟五千斛旌為義民未幾閩寇猖獗郡守率民兵往禦本毅然隨行景泰癸酉募富民納粟實邊本供白粳數百斛將上道疾作遣子淳代往同時陶鉦菊隱四世孫亦輸穀麥二千石授七品

散官

浙江通志

范麟字桂巖鄉貢選粵東教諭親老不起景泰成化間應詔捐粟賜六品官辭以子璫贈御史

秀水任志

項綱字立之尚書忠弟質之子也忠昆弟三仲曰質季曰文質字素臣不仕綱成化辛卯舉人知昌邑縣調長葛買陸氏宅將徙居破垣得藏金急召陸謂曰子有先人遺貲何賣宅為乃於中取宅價悉所藏併宅還之夜夢人搢笏拜於庭曰僕陸氏祖也已得請於帝矣授一篋啟之三紙皆署參議字後果驗

徵獻錄

夏雷集慶里人叔客吳門三十年垂橐而歸病不起為治

喪葬故人樂松為怨家所構往來居間費數百緡鄰婦
窺雷獨寢擲餘桃以啖之急起脫身走後以義旌賜章

服 兩浙名賢錄

項穆字德純元汴子國學生以子皋謨贈中書舍人嘗置
義田以資族人贍府學及嘉興秀水嘉善三縣學之貧
士凡千餘畝詳學校門能詩工書著貞元子集書法雅
言雙美帖行世季弟德明字鑑臺諸生族子私售襄毅
墓田獨捐貲贖之從孫俊卿償其直弗受姊二貧寡推
解不絕能鑒別書畫旁通術家言著演禽玉鏡等篇皋
謨亦能文著學易堂五記襄毅實記 吳志

卜宗洛思賢里人國學生性孝友輕財喜施不給者叩之

即應子四孝友如其父大同大有大順皆成進士 袁志

周允文號衍溪襁褓時其父賈於燕允文侍母喪葬畢偕

姊壻訪父京師見人輒哭詢一翁語以在塞外允文遂

出關冰霜踏頓逾數千里一日遇諸途父子抱持慟哭

牽裾趣歸色養數十年並以壽終子鼎隆字道從亦以

孝聞事兩兄友愛補諸生與同郡宋鳳翔文譽相埒 秀水

李志

屠隨裕字君修應坡孫恩貢授上林苑監丞出為成都府

通判鎮松潘安苗構亂督餉支應不匱隨總督朱燮元

平之與宴賞歸事生母扶病嘗藥歷十年不倦年七十母歿執喪盡哀

徵獻錄參 秀水任志

沈璧字東隱正德間應詔輸粟助邊授千戶弟兄五人最友善析產推腴受瘠代兄徭役季弟屋燬於火出貲營之比沒撫其孤如已子

曾丙與弟雨天性友愛奉母孝詳兩傳丙之子子唯諸生內行淳備兄食貧悉以田宅讓之又償嫠妹逋三百餘

緡早卒 以上 劉志

項元淇字子瞻綱孫性孝友善視異母弟篤壽元汴讓財於季倭入寇嘉善議拓城以禦城外列肆僦人素獲利

拓城當撤去以故緡紳多不欲元淇獨首撤之閱月築

城成邑得保性落拓不事生產工詩詞草書以貲拜上

林丞丁艱歸食貧親知遺贈卻弗受時與騷人衲子往

來唱和談名理著少岳山人集 徵獻錄參 浙江通志

項元濬字子南忠曾孫早孤遺貲萬餘金母命寄府藏嘉

靖甲辰歲大祲元濬悉蠲以賑飢太守欲上其事辭以

蔭為衛千戶西司房理刑值分宜柄國屢興大獄而子

婦又太宰吳鵬女也避勢挂冠歸子承芳萬曆癸未進

士為漕運理刑官中官在淮者通賄作奸列狀糾之得

旨逮闖并罷中官督漕 秀水李志 參徵獻錄

陶廷錦字公重家貧有隱行友人坐事逮捕暮夜持數百金授之且告無還期立為緘封授婦後友事雪舉囊歸之封緘宛然族兄鑰家富厚無嗣戚黨議立其子力辭復議割腴田四百畝助之亦不受任饒州司理陞鎮江府通判俱以廉能稱子涵中領鄉薦

劉志

黃承蒼正色子友人胡振芳令斬水全家罹寇胡獨歸依承蒼終其身胡歿鬻田葬之子齊賢嘗典質完人婚著

孝史廣刑戒詩臆

吳志

萬邦彥字濱虹嘉靖乙卯舉人從子壽國字蓋卿萬厯甲午舉人並志行高潔不樂仕進閉門著書以立身行已

率後進壽國事母孝子孫孝友姍睦數世同居禾中家

法推之

吳志

沈東字啟明以貢授博士母喪哀毀不爐不扇不踰外閭者數年

袁志

鍾璧字良玉宸濠變三丁籍一勤王璧年十八三兄秀鼎肅俱隸學宮官報父端名璧曰家有四子不能免父從軍緹縈何人哉遂代父行宸濠平得歸孫庚陽進士官

刑部郎

吳志

劉鏜字大聲舉明經資廩餼以供甘旨弟程未娶積束脩為締姻人勸之仕曰我不能及親而仕今親死為五斗

折腰耶杜門教子子宗亦以孝聞

袁志

吳槐少失怙母病革焚香籲天割股肉為羹以進不以告

人袁志

徐瓚以功曹任廣東海陽巡檢會開礦聞父喪賈人餽百

金冀緩須臾行可亟發倍獲利瓚卻之曰父死之謂何

而以利為哉遂奔喪歸濱海人高其義為立卻金碑

吳志

案徐氏世居秀水而瓚孫學周曾孫必達元孫世清
吳志載在嘉興列傳以其曾寄嘉興籍也今仍之

沈文銳國學生萬歷十七年大旱民饑捐米麥三千石佐

賑濟後復捐田三百畝分贍嘉興秀水嘉善學又以三

百畝為秀水縣義田議授光祿寺署丞同時同知寶文

照國學生寶國元賑饑施棺埋骸俱題旌建坊

嘉興何志

沈元昌字鴻生幼穎悟年十二補弟子員以孝聞居喪哀

毀致疾有弟四人食同案出同衣先人遺產悉讓之舉

於鄉兩任司教五子九孫耕讀孝友不替

袁志

邵宗舜字瑤光諸生工詩賦善草書父母亡哀毀骨立時

有押運重役馨鬻私產為兄弟償逋瘁心力不悔鄉黨

重之

葛學孔字碩溪性至孝親歿廬墓十餘年讀書敦行不求

聞達舉鄉飲賓子兆魁字孟侯諸生端重不苟笑好尚

論古人遇忠孝事輒流連不已甲申後杜門卻掃號完

吾以志節稱孫天麟亦有文行後人登科甲不絕鄉里
以為世德之報以上吳志

朱茂曜字子蕃太傅國祚孫國學生崇禎辛巳餓殍滿野
茂曜鬻田葬之不下數千又收棄孩於路為粥僧院活
千餘人日走赤日中不自恤謂人世大夢錄古今史傳
及所見聞凡夢兆之可徵者為徵夢錄二百卷生平和
易接物語及綱常臨大節赴大難毅然有不可犯之色

明詩綜
參家傳

姚充字叔信喜吟咏父悅為仇家所陷充代父繫獄年餘
別駕陳守義夜聞獄中讀書聲覆地得昭雪著尚元草

秀水
任志

吳天泰字謐生少負異才以作者自命性孝友母病顛城
隍神請減算代母夜夢神許延母一紀教其弟成立子

周瑾諸生曰來舉人俱能文天泰著有星帶文集舊浙
江通

志參
吳志

姚世華字孟實父嚴有所譙讓輒引咎跪請居喪毀瘠腴
田推幼弟當就試南畿以母病日不肯行督之往得雋
歸母病疽衣不解帶日夜悲泣所以身代母尋瘳世華
四十無嗣卒後五日妾舉一子柳志

高尙志性至孝母陸以少子死悲哀咯血幾絕尙志奉湯

藥昕夕不交睫顓天割股和藥以進母尋愈郡縣及學使者旌其廬袁志

范明泰字長廣登萬厯庚子應天鄉榜事親至孝父歿任所扶柩遠歸哀毀如不欲生母病徒步千里求醫夜席

藁牀下聞聲即起請減算以禱讓宅從弟婚嫁戚族數人秀水任志

王道立號雲洲道人性醇恪父疾調治湯藥自浣廁踰率婦子顓天請代父卒廬墓傍哀至殞絕母病篤口度藥

以舌引痰泣盡繼以血既葬廬墓如父喪且終身焉臺臬聞之檄府旌其閭李日華王孝子傳

姚堯允字雲卿諸生博通五經諸子肆力詩詞時苦漕兌多費力請直指除其弊年饑倡捐賑人沾實惠子徽豈

孫建侯諸生礪舉人曾孫祖愈廩生以忠厚世其家吳志曹大田幼孤母苦節撫之及長娶婦蚤卒大田年三十母

勸更娶大田曰娶婦為後計耳兒有子矣遂不復娶教子谷成進士官御史贈如其官

吳鉞字節侯諸生性至孝父有痰疾終夜扶持不少倦與兄鑄鏐同居友愛以上秀水任志

俞振紀性至孝母卒年甫舞勺負土成墳慈烏巢焉里人稱孝烏冢父壽逾耄蠶生養死葬皆盡禮四旬艱嗣續

妻李氏夢竈神告曰念某盡孝已達司命自此多男矣

果連舉五子仲子昱篤學好古著有茗柯堂集秀水任志參樵

李詩繫

徐世濬字思子必達子幼負異才孝友真篤輕財好施嘗

以千金濟人急食餼當貢稱疾讓需次者與弟沿其營

千金之宅後讓沿勿較也子格究心理學亦以孝友著

孫燮元有學行早世吳志

吳兆華字孟崧孫崇禎時明經為同里陳懿典馮夢禎

所推許性耿介不妄取與有孫主事贈以金而無名固

卻之弟奕華字仲崧好義遇歲飢首倡平糶收育童稚

全活無算兆華子元湑字友玉有文名吳志參樵水任志

宋應祥貧而有操旅舍得遺囊三百五十金候其人還之

其人感泣願酬其半應祥謝不顧子三季曰承武盡弟

道長兄性嚴急事之曲謹孝友敦睦里黨重之子瑾有

吳志傳

陶經字協嘉隱居復禮鄉父病割股以療乞減已年益父

算及親歿茹素終身言方行矩里黨稱之吳志

及邦清字鳳儀七歲居父喪如成人奉母竭盡子職母卒

擗踊廬墓動遵古禮年二十妻亡不再娶二子亦盡孝

妯娌化之一門雍肅郡守監司旌其廬舉鄉飲賓王庭

為立傳袁志

徐柳臣字亦于好奇負志節崇禎丙子舉于鄉有司重之欲見不可得庚辰公車罷歸已抵宿遷聞友郁起麟病于費縣旅舍策蹇往視之起麟死經紀其喪遂染疾卒兩觀同歸人稱死生交誼祀鄉賢祠仲子齋方總角張溥奇其才以姪女妻之季子維以俠聞浙江通志參吳志卜年字翁洲崇禎己卯舉人時當鼎革閉門不與人事父通年邁備極孝養自奉節儉郵親黨不少吝著有言

志集

吳志參秀水任志

劉謙齋績學砥行負時名四方爭延為師以母病躄不往

終日一室母子相依人稱劉孝子李日華有傳

姚勉字仲堅博覽羣書兼習岐黃家言好周人急有負約悉焚其券鄉里德之子敬明州守孫宗豫教諭宏賁州

佐俱能世其家學

以上吳志

張泰徵字萍止諸生崇禎末兄晉徵棄官歸泰徵亦不復與試兄弟偕隱極友于之誼其後數世同居里人方之

義門鄭氏

秀水任志

沈瞻日字仲臨諸生父耀辰宦粵東值鼎革烽煙阻絕冒險往尋數濱於死卒奉父攜弟以歸子京文字彥博品高行潔工制藝及古文辭以明經終有藏笥橐

吳志

朱茂院字子芾國祚孫崇禎初諸生甲申後棄去授徒以老著錄者百人從子彝尊與焉故人邱岳以子託浮海入粵轉徙閩南而死茂院視若己子為娶婦教之成立詩文質而古如其人有願頌集樵李詩繫

杜蘅字芳洲諸生友于兄兄偶病思烏梅餅假寐間見一人乘小舸雅似蘅俄聞剝啄聲而覺啟扉蘅果入袖出餅奉兄詫喜病遂愈時蘅客武塘適思兄心動而歸不知兄病也蘅嘗念母老禱於神願減算獲一第庶盡祿養竟齋志早卒子媚三歲而孤亦有至性遭母喪哀毀備至周貧急難樂善好施終其身著有金臺集草堂雜

著後並以媚子孫貴贈尚書任志

戚敬字秉肅白苕里人其先有名同文五代時號正素先生孝友傳家至敬母疾刲股進母已不能啖痛絕復甦將葬掘穴尺即湧泉親負土累若高陵結茨廬側恆望墓頓踊吳門之陷前鋒無敢犯者敬瞪目起曰吾忍離親墓耶集豪右子弟卒保累中稱無恙後公府聞將賞之不顧終身為文學掾未徙官錄一夔記

國朝

吳三錫順治辛丑進士中書舍人讓田宅與叔及弟捐置祭田義田以贍族為棗強知縣有昆弟爭產訐訟七載

三錫以至情反覆開導二人相對大慟和好如初著勸

孝錄行世入鄉賢祠

浙江通志

董士昌字甯庵順治進士砥行好學然諾不苟嫻戚中孤

寡貧乏者為之婚娶朋友有急解贈無恡色歲歉倡捐

以賑民間婦女為亂兵所掠出金贖還之知陝西平利

縣卒於官

浙江通志 參袁志

張瀾國子生好施與康熙九年水災米騰貴倡行平糶之

舉全活無算施茶四十年濬河築橋路皆盡力為之祀

鄉賢祠

浙江通志

孫鍾瑞字子麟幼以友讓稱甲申後精探濂洛淵源以主

靜為宗律身嚴擇交慎誘迪後進娓娓不倦歲饑賑活

甚眾生平周困恤喪不勝殫述著有聖學大成可人集

易學心符等書

秀水任志

朱彝敘字範臣茂時子拔貢生少負雋才為張天如陳子

龍諸人推重奉父孝先意承志至老不離左右父病醫

莫效有方外踵門療之旋不見人以為孝感父歿時彝

敘年已七十里人王庭題贈有云七十而慕純孝何疑

子建子貢生著闕里記儀禮喪服考孫丕或進士有文

名

吳志 參伊志

沈綰縣學生父廷勸為樂城縣時平清河之亂有婦女被

繫者勸父請於主將咸得釋祖遺祭田倡立條議凡讀書膏火及貧老鰥寡孤獨者給之以親疎為差入鄉賢

祠

浙江通志

何漢偉字君階幼遭亂被掠得釋借兄尋父骨以葬嫡母曹病刲股肉以小鑪就牀側煮之曹於昏迷中聞肉香而甦索食一啖而愈事生母一如事嫡嘗病自恐不起呼子檢諸佃逋券焚之又有陶宗恒居父母喪哀號不欲生既葬先後各廬墓三年嘗有羣鳥數百啾鳴松柏間若助其悲哀二子嵩崑為兩兄後子處終其身雍正十一年何與陶並題

浙江通志
旌
參伊志

崔上煥字建章父千戶某為同僚所陷擬戍邊上煥年十八走京師五擊登聞鼓刺指血書寃陳當事天寒血凝不得書痛哭引佩刀斫指指幾斷書上竟從輕議事嫡母張生母朱皆孝謹由吏員授思明經歷終甯洋縣祀

鄉賢祠

伊志

鄒世麒字魯傳考授修職郎弱齡喪母徐號不止父宗仁諭以大義始節哀父坐臥一小樓日夕侍奉有乳燕數百羣巢樓下人異之名百燕樓父病衣不解帶籲天願以身代及卒擗踊泣血絕而復甦事繼母屠亦孝迨葬有白鶴一雙飛遶墓上人咸謂孝感慕義好施終身不

倦卒時猶以捐修崇聖祠屬其子成之著有西村詩草

浙江通志

婁光曜字君政好讀書樂道人善而隱其過少時嘗有寇

數百人突入其村驅婦女鏹置古溪庵光曜與同村沈

某募鄉勇逐之出婦女護還家康熙乙酉舉鄉飲賓伊志

婁承康字安生康熙間歲稔屢捐粟設粥以食餓者旱疫

則手丸藥以療之鄉人某將鬻其先世之墓地於人承

康憫之以金購其地而誠子孫永保其墓夜夢老人來

謝曰我子孫不肖賴君保骸骨陰德甚大君當大壽年

九十無疾卒伊志

吳天俊諸生家貧力學性孝弟乙酉被兵時母姚病道路

梗塞無從覓醫乃泣禱於天割股以進一日盜至奪其

父臥具俊哀求不已盜怒擬以刃刃忽墜僅持一柄盜

驚愕去兄病廢養之如父終其身吳志

錢國元字瑞芝母楊病篤醫不效顛天割股療之既痊復

病又割如初華德禮越人遷禾年十六母患心疾藥罔

效割股煮糜以進乃痊郡縣並旌之袁志參秀水任志

沈惠纒字馨聞諸生少喪母哀毀如成人鞠于祖母馮馮

病刲臂以療馮竟瘥盜發其母殯蕙纒號呼于當事頓

額出血匍匐上下三年而盜獲當事從末減不寘盜重

典蕙纒憤恚欲死屬異母弟善事父而已棄家遁子修誠長乃尋蕙纒歸遭父喪年逾艾哭聲人不忍聞蕙纒自母殯被發後終身哀痛不處肉不飲酒食肉乾隆八年具題 旌其孝詩文沉鬱有二寶居士集

伊志參吳志及桑調

元傳

吳國楨字君益父敬源以落拓罄其家足成痿疾國楨服賈積漸饒凡可以娛親者靡弗至父愛博日置錢牀頭以供其戲又愛友人過談日具酒食款留使客不去父乘興意博而博意談而談恒嬉嬉忘其足之痿也以是臻上壽戚黨貧而死或無後者國楨曰於我養於我葬

無倦容父沒乃遨遊名山曰吾向者辛勤數十年徒以

慰父耳今老矣安能疲精神於阿堵中為子孫計哉後

亦以壽終

伊志

張作霖諸生刲股治母病創未合越一日遇道者曰我知

汝臂痛有藥在方拜受忽不見敷之立愈

吳志

朱良字恒夫早孤事母孝家貧甘旨必具母喪哀毀骨立

與兄不析箸婦亡不再娶讀書潛心理學有醇儒之目

知縣王廷機旌其廬

秀水任志

屠英康熙戊子副榜知井陘縣遷知灤州居官勤敏歸田

後敦本睦族捐資修康僖公書院

吳志

陳王愉字怡靖知府史載重修學宮王愉首輸數百金以襄其役族兄某負客三百餘金代償之助友人婚喪必盡力巡按王元曦具疏題旌同時杜允陞字道周亦

好義里有沈某將鬻妻以養親允陞傾橐濟之得不鬻

吳志參秀水任志

鄒模字景巖五世同居寬厚好善延名師訓戚黨子弟多成名歲凶出粟賑濟其孫探以孝行稱

卜玠宣字電章四歲遭回祿失父所在號呼赴烟焰中攀其父捧祖像以出人嗟異之長工詩文舉於鄉著有冷

溪杏軒諸集

戴樹屏字集宣國學生事父母曲意承志有疾衣不解帶嘗割股以救父母疾操行端謹族黨有急必調著有望杏軒文集子宏濤孫露俱有文曹德望字渭公母疾亦嘗割股進諸昆弟困乏者輒助之

沈選文字聞瑤國學生善承父志讓財與叔偕弟同纍白首無間言而持躬凜凜不苟諧世金士龍字雲生年七十時事九十老母彌謹不怠撫弟姪多成立鄉黨稱之朱元字子肩諸生七齡喪母以失遺像每夕冀形夢寐積想五十年一夕夢神謂曰當使汝見母有姪淳尙幼不知繪事忽言夢大母遂援筆成像宗黨詫爲神肖事繼

母孝撫諸弟友愛分產推腴取瘠諸善事力行不倦

盛烈字載揚號竹坡廩邑庠貢成均父孝廉藻早歿悲不

逮養事寡母陶氏有孝聲勤儉起家修宗乘增祭產賙

族姻康熙丁亥戊子間歲常歉開困貸鄉里不責其償

居聞湖濱課農暇扁戶喜聽讀書聲故有子七人名多

登士籍

桑調元撰傳

盛支燧字恂如幼孤母陸苦鞠之貧不能從師乃助母晝

夜紡績以易米母子依倚二十餘年雖困甚不受人周

恤湯之旭為立傳

以上吳志

葛天麟字雯倬歲貢生性好義嘗以府城水道淤塞請於

郡守佟公倡捐開濬民便之生平急公類此弟天鳳貢

生天鵬麗水教諭子清字懷古進士授南康縣有惠聲

涵字容度舉人以年老

特恩授國子監學正銜

吳志參伊志

陶德信字季彝父歿終喪不離殯所事母一如事父知府

閻堯熙嘉其行舉鄉飲賓

吳志

王孝子失其名字子勃號又陶穉祿失母垂四十年子勃

隻身走萬里歷諸艱訪至陝之華亭詢父老得母骸骨

負之歸任僮作王孝子入秦記查昇陳奕禧皆有詩紀

其事

伊志

沈修誠字辭立父蕙縷避家難遠遊母高口授以經書語
 及父修誠輒飲泣發憤力學時母居城祖依叔居郊外
 隔十數里往來定省無間嘗除夕大雪自郊外歸陷泥
 淖中不能起忽有攜燈掖之者審視無所覩人以為孝
 感補諸生聞父在燕徒步三千里勸父歸母病篤籲天
 請代父歿哭至昏絕乃甦修誠善詩古文慷慨有經世
 才終不遇乾隆九年題

旌伊志

婁東字載陽父患疽醫云毒已陷東即口吮膿盡見血
 而疽愈母瘋醫示方必得天目山海風藤乃可救藤在
 山巔至難取東即奮然往足繭萬山竟得藤療其母父

復病軟脚東侍湯藥十餘年父卒母又病時家失火東
 從烟焰中負病母出竟無恙逮母故廬墓不肯歸或勸
 之東曰吾舍親何適也既而病革欣然曰今而後始得
 長依父母矣方東葬父母時天雨東呼天哭天為霽及
 廬墓有鵲數千來巢墓木人皆以為孝感乾隆五十年
 請旌入忠孝祠

伊志

陳紹賓字茂章父洪銓患脚疾危甚刲股以療得痊雍正
 十三年九月事

伊志

屠世芳字英發三齡失恃事繼母張孝父嬰疾衣不解帶
 者半年籲天願以身代父夢道人授以服貝母法乃得

瘡繼母歿撫幼弟弱妹體恤備至乾隆九年題

旌伊志

朱嘉謨字聖言國學生縣之濮川人嘗設義塾置義田結

放生社施棺施棉衣拾人之骸埋之留人之嬰育之於

行旅則夏蓋涼亭冬給薑飲孜孜如不及每舉為善最

樂訓其子沈尙書德潛陳布衣梓各為之立傳伊志

沈敷懋字禮存順天諸生父青崖以官事下獄敷懋詣部

訟冤事得白母卒創痛幾斃死家人焚楮延燒幃幙將

及棺敷懋奮身撲救旋撲旋熾燎及衰經股體焦爛越

九口死乾隆十二年題 旌伊志

王鳴鳳王朝陽皆幼孤皆農家子鳴鳳母患乳癰膿潰不

可近以口吮之竟愈後送母殯露處殯旁不肯歸村人

為結屋覆焉朝陽喪母哀毀不欲生將葬命妻守家自

蓋草舍於墓旁出耕入息積數十年未嘗離於是遠近

稱者此曰王孝子彼曰王孝子云伊志

王鏗字鳴和邑庠生住恩三庄翔字圩少孤母黃氏患寒

疾侍榻前恍惚聞神語曰汝母病非人肉不能療治頓

悟焚禱潛剖左股進母飲三日愈新纂

胡樹柵字藹谷諸生少孤事母鄭孝鄭沒寢食總帷者三

年雖疾病不飲酒肉有某售以屋歲入賃錢若干後某

貧且老樹柵還其券戚族中有倚以衣食者十餘年如

一日撫人遺孤至成立未嘗有德色所著有經疑性理
心解等種

伊志

李璜字方玉以南河効力得通判銜歷惠州府建社倉權
本息數年間溢穀逾萬水旱有備守惠八年進南韶連
道造河橋以通行役家故饒璜爲置義田五頃屬子孫
善守之刊有祠莊規條

伊志

楊元龍字愷若性慷慨尙義少貧兄蚤世遺孤廷甫啐元
龍撫如子旣自以賈致富遂以其財與廷平分之與人
交然諾不欺有以急難告必曲爲之籌乾隆丙子出粟
賑饑給州同銜廷字陞遴亦孝友工書法元龍子建字

立三能承父志與廷相友愛無間言歲大疫倡同人爲

掩骼之會收瘞無數與元龍同時捐賑者有張邦琪王

維新並貢生

伊志

陳國祥字禹銓輕財好施有鄭道衡者代人貿易主某姓
虧折本三百餘金情急將自盡國祥約某姓分任代償
之某諾而食其言國祥慨然曰我雖貧何忍爲德不卒
也盡括其貲本授之子煥字明上有父風讓產於弟舍
田作祭產捐粟施衣造橋修路當事表之以子徵餘

贈六品銜

伊志

沈雍嘉字維章少習儒業念無以爲養乃去而服賈藉所

入供甘旨父患溺不下醫罔効或云此非藥力可治若
以人氣吸之當愈雍嘉卽以口吸吸至再三溺果下病
霍然父後又病痢雍嘉年五千餘矣親自澡拭累月不
懈事繼母孝謹友于兩弟無間言市米貴傾廩米千餘
斛貸鄉人不促其償後償及半念餘皆無力者併取計
簿焚之子琳自有傳伊志

曹願學事繼母魏孝魏病篤割股和藥進魏愈而願學以
傷重不起臨歿屬妻汪氏曰善事舅姑弗負我志也聞
者悼之年二十五伊志

朱克綏字慰蒼諸生父母歿哀毀幾滅性授徒京師有同
里某父死邸舍克綏以數歲所積贖其喪某得扶櫬歸
撫弟姪修祠宇鄉里稱長者官給額旌焉伊志

王嘉魁字士超附貢生濮院人能詩兼工隸乾隆乙亥鬻
田助賑又募人粟得千石全活者眾兄景瀾亦好施伊志
陶讓德字遜庵善治生乾隆戊辰出米六百石減價平糶
庚午又出糶如前數乙亥助賑米六百石當官旌之又

嘗承修 文廟費白金一千五百兩一椽一瓦皆親理
之諸宮贊錦有記王江涇之間店橋水湍駛讓德獨力

重建工甚固性儉雖積贏萬畝自奉粗糲終其身同時
顧應隆與讓德皆思賢鄉人家亦饒遇平糶捐賑亦出

米食其鄉人以自保太守旌額曰志存任恤學宮之役
隨讓德襄其事伊志

沈子章世業農而好善嘗歲疫施棺槨而尤以修橋為已
任竭廩寒暑經理匠料告募不足輒鬻產以畢其工遠
近鄉村凡修橋大小二百餘處人呼為沈佛子伊志

汪大紳字縉年舉人少嘗到臂肉療父疾有責其非者謝
曰固知身體髮膚不敢毀傷但見父病篤冀全生我之
身不暇顧我身耳聞者歎服伊志

張嘉猷字振緯太學生好任恤歲饑則收養所棄之男女
於道凡里中同善同仁會及修賢良節孝祠等舉每任
其事不辭勞伊志

莫世洪字對揚本姓施歸安人寄籍秀水以副榜任樂亭
知縣世洪早喪父母無期服之親與再從叔同居事之
如父家事一稟于叔終其身無私蓄人以為視古人大
功同財之義而又過之伊志

陸起鳳字宏勳柿林人母梁氏早世父景宣懷才落魄游
歷都中關外十餘年起鳳事祖孝嘗聚徒於鄉距祖父
母居七里無間寒暑每日五更奔往問安執爨浣衣衾

滌廁踰事畢復之館教讀夜攻醫書館穀所入悉養祖
父母喪葬盡禮父倦游歸善怒起鳳勉承色笑必冀父

喜而後已

新勝瑣志引馮
浩橫塘紀聞

沈元龍字在田紅墩村人母愛少子來鳳析爨時祖遺良田悉讓之守瘠產不及頃以力耕起家弟歿時恤其孤鄉里有詬詈至門者閉戶不與較壽九十終子繼賢生子七最幼曰德璋字樹銘繼賢歿奉養生母李晨餐夕膳未嘗委諸同母兄嫂輕財好施道光三年水妻兄王居法五莊正宿圩地尤低窪田廬淹沒德璋時家已中落猶復月饋薪米親串感之

新勝
瑣志

李淦號春浦乾隆癸卯科舉人天姿穎粹事親以孝聞父嘗嚴冬痢下懼中寒蹲身舒兩臂於圍器用資柔暖與

同里楊禾孩王碧山結愛吾廬文社有師竹齋稿

參稿
里志

樵李詩
繫續

陳徵餘號香圃以舉人挑選授遂安教諭生平績學砥行事父母以孝聞友于之誼至篤里黨稱之

于志

吳耀本任南呂字圩年十七父故哀毀幾至滅性撫弟妹婚嫁母患寒症垂危籲天求禱願滅已算益母壽跪拜七晝夜不已卒至割股以進母病獲瘳有堂嫂方氏撫週歲兒守寡不時周其薪水方氏得以終守母歿哀痛一如父喪年五十三無病而終

于志

唐桂森庠生事父鳳池克盡孝道父沒京師聞訃哀毀逾

恒母病痢桂森剖左右兩股和藥以進母病獲愈子志

岳鑑諸生經五子宋岳鄂王裔孫至性孝友沈毅有為郡西郭外舊有岳王祠久燬兵燹鑑父觸目愴懷嘗以力艱興復為憾臨終囑鑑必復祠祀鑑涕泣受命一木一石銖積寸累歷三十餘年而祠成又殿後建啟忠祠傍建支祠復官祭置祀田具祭器規畫周詳纖屑靡遺著金佗祠事錄八卷乾隆五十五年將祖遺地三十六畝坐落秀邑藏字圩捐入普濟堂作為義塚賦稅仍歸岳氏完納嘉慶十五年奉

部議敘道光三年具題奉

旌于志

薛灝祖君華嗣祖君德父體純灝承兩支咸得歡心凡服

勞侍疾養生送死俱竭心力父歿後隨祖客江西祖病逆旅灝拜禱七晝夜有道士詣門予以藥丸曰病可療數不可逃服此當速歸服之疾良瘳偕歸逾月祖病復發而卒人謂孝感所致道光十年

旌于志

高桂諸生弱歲即為祖母沈氏舐盲目復明父上達性嚴訓諸子不稍假借桂婉辭解慰屢獲壽顏門內稱順父欲建宗祠齋志而歿桂竭力營辦卒成父志兄松早亡事寡嫂撫遺姪無間道光十一年

旌于志

沈廷傑性孝友遵父母遺命自嗣曾祖父母以下一身營

葬兩支凡戚黨及幼姑弟妹窀穸婚嫁之事皆獨力仔

肩克慰先志母病籲天跪禮經月庭蓮結實並蒂剖房

得丸如桐子服之而瘡卒年七十道光十四年 旌于志

田政號揆伯事親曲意承志有疾衣不解帶母年七十時

病劇刲股和藥以進遂得愈母年過九十歿嘗繪二親

遺像供臥室中朝夕焚香時食必薦孺慕至老弗衰有

弟分析後貧不能給時解衣推食每云薄待我弟即欺

我親鄉黨宗族皆稱其孝弟焉 于志

卜昌增生幼有至性祖母老而失明出入扶持不離左右

父有疾禱於神願減已算以延父壽父歿哀毀骨立事

奉邁母敬事寡嫂姊歿撫甥成立里黨賢之父欲修祠

墓未果積館修所入以完父志族有力不能葬者出資

助之歿後沈侍郎維鐫為銘其墓 于志

楊伯填號古漁性慷慨尚義母病篤割股以救得愈奉養

數十餘年曲意承志里黨稱之 于志

沈連幼失怙母以祭墓墮水連躍入水救母出得無恙與

兄某先經分析後兄歿家貧教養兄子成立並為經營

婚喪諸費著有綱鑒撮要若干卷 于志

顧綺字雲高父秉良疾日侍湯藥父歿數日水漿不入口

母俞患瘍以口吮得愈母沒晝夜哀哭越五月卒 于志

顧連奎家貧不給鬻餅餌於市以養母負擔出外雖遇風雨必歸侍母側無一日離左右穢器必親自澣滌母病輒憂惶焚臂香以籲天病愈輒喜晚沽酒進食則執板歌俚曲以娛母有老萊子風母歿哀慟不釋葬後終歲不樂鬱鬱以終

于志

陳世楨邑庠生性至孝假館於外越數日必歸省母疾到股進時大暑不去衣恐人知也次年母復病復到又獲愈事嗣父母亦以孝稱

于志

吳大中務農誠實寡言父疾寢室狹隘臥地以伴長年不怠病甚割股入藥父病頓瘳父歿哀毀盡禮妹適人家

貧乏恒依給之

于志

戴永智幼業儒賦性敏穎比長以親老家貧輟讀就買供旨甘罔缺父世臻患足疾延名醫胗治不惜厚資半載父足愈母馬氏驟膺日疾虔往天目天竺諸山禱求獲劑而歸母目復明逾年兩親相繼歿永智哀毀盡禮並承先志建立二戴夫子祠於北麗坊復捐地添設新安義所房屋又買市廛以備歲時修葺之需卒年五十六

道光十七年

旌

于志

倪棟庭事親先意承志母病失血甚危日夕侍奉湯藥衣不解帶者彌月深夜焚香籲天願減己算以益母壽逾

時未愈乃潛割左股和藥以進母飲之疾遂瘳人咸以爲孝感所致云于志

陳振聲字集齋庠生偕其弟太學生延聲能承其祖元朗志樂善不倦凡郡有興建及恤嫠普濟掩骼等事莫不踴躍奮義其大者爲義莊爲育嬰堂堂舊在郡西門外嘉慶二年移建於城東常豐坊振聲等卽舊堂置接嬰堂收遺孩而送育於常豐坊道光六年振聲子宗栢復建爲育嬰堂歲收嬰孩約三百口爲人抱養爲子女者歲嘗百口于志

沈芳性好施與事母以孝聞同里陳載煥陳兆麟陳錦楊

應宗沈方慎顧渭珍皆能爲善於鄉凡遇地方善舉無不踴躍贊助由族親以推於鄉里闔鎮皆稱爲善士于志

楊汝璠沈維鑑並住王江涇道光三年捐貲助賑奉

部議敘于志

于楷號蘭林邑庠生住王江涇樂善好施遇疫青爲掩骼之舉著有地理錄要三卷于志

王承勳監生住新塍鎮凡修建橋廟必剏首募捐無難色又同鎮監生許汝賢捐賑五百兩亦邀議敘于志

岳傳經號半農濮院監生力行善事每遇恤嫠接嬰同仁惜字諸義舉皆竭力贊成偶值偏災倡捐施濟又建立

宗祠捐置祀田七百畝藉調戚族于志

陳柟內閣中書與同里陳櫛周燮俱歷次董辦賑務並天

寧寺造修工程櫛官江蘇布理問燮官泉州通判于志

江天錫監生住新塍鎮好行善事曾獨力建二橋曰汲水

曰南橋冬令製棉衣施捨歲以為常于志

華觀光號如陵住王江涇州同職銜年百有一歲百歲時

里人斂金為壽辭不受云吾衣食無缺多金無用不若

以此辦地方公事里人即以金修治街道至今稱其里

為百歲街于志

王元相字佩臣自江蘇移籍來少游九華山途次拾包裹

發之白鏹與記籍坐待良久有踉蹌來索者問數符歸

之晚歲勤劬如少年未明即起人定始息遇水旱凶札

為眾倡先施與延師教子弟歲時伏臘有受代者故無

曠課為善讀書後人相繼登第子恩壽官部曹有孝行

已請吳江沈曰旌表富贈序

盛堯春號墨莊以諸生保授教識歷署新城太平縣訓導

善賤奏浙撫梁寶常王植吳文銘辟佐幕府同治癸亥

羣盜如毛仗義乞師微服渡錢江懷檄謁左帥左允所

請乃航海歸以勞瘁旋卒新纂

陳端治號念農縣學生援例署武康縣教諭濟困扶危臨

事勲懇道光丁未河南饑卽輦金前往開封府設局散賑有遺金就祥符縣治崎嶇山路成街道二行旅便之其權學官也捐俸修尊經閣又於己酉水災辦賑出力累膺保擢至鹽提舉新纂

陳茂垣字壽卿柵孫道光癸卯科舉人內閣中書己酉水災散賑邑令江忠源器重之凡粟糶乳嬰梁涉樁露諸善舉輒解囊仍復隱託歲未暮踵門至者絮凍哺饑動以干計丁未河南患旱戊申湖北患水均糾合萬緡邀陳廣文端治俞茂才汝銘前往不欲人知戊午己未間郡城至嘉善平湖諸水路花柳歌吹傷風敗俗赴省會稟大吏禁絕尤為除苛解燒在京供職漢票籤額外中書舍人踰年卽歿旅邸節陳氏家乘傳

沈槃字寓谷庠生中年後患橐駝疾無志功名孳孳為善向有同善會濟士族孤寡後窮殘日增隨同陳中書茂垣趙明經華恩推廣其事擇冷仙亭創行惜字會朔望親自焚化又舉敦化玉成兩集凡無力從師者每月赴集課之幼稚溫經成人講藝造就者甚多新纂

陳功安郡庠生原名功吉孝于陳元朗元孫宗祠失火隨父往救火勢將及急負父出又侍父從譚仙嶺歸中途遇風折櫓舟將覆奮身入水緊拽船舷擱淺岸得無恙

父病露禱致疾父歿痛不欲生越六日卒咸豐八年請

旌節題
奏稿

周城字一成號金浦誠樸寡言不近時趨集先正格言曰

範身錄刊行
耘庵詩話

屈有成號慎齋先自吳江遷王江涇家赤貧挈幼弟貿易

荆楚妹適沈早寡舅姑欲奪其志乃迎歸持門戶沈時

來詬詈至遁入尼庵為置產贍養後謀歸娶會所親負

逋三百金不得值傾囊貸之爰至三十七始娶婦劉生

子佩璋亦篤行善再傳至慶墉茂垣異母出友愛無間

庚申避亂猶賃屋前後以居墉歿垣悲哀盡禮同治紀

元當事以懿行 聞 詔旌悌弟著有招鶴山房詩稿

新纂

沈德馨字書徵號秋圃割股愈母疾居萬安橋咸以孝稱

新纂

姜承烈字綠堤諸生家世寒微宅心和厚苦志力學雖暑

夜不忍撲蚊嚙甚一拂而已規行矩步出入不平視不

嘖笑母卒不脫衰麻茹素無言葬即歿年未及壯咸豐

八年請 旌節
新纂

楊之鐫字怡村少失學為人主租庸性孝弟不娶兄弟死

瞻其寡嫂弟婦既又力葬祖父四喪心力益瘁庚申賊

至被六矛匍匐以免扶至祖祠死得

旨賜卹 浙江忠義

沈德鴻住王江涇吳江糟字圩咸豐庚申賊至鴻僅十四

齡自書塾逸出聞父維錕被擄因佯裝賣餚果狀出入

賊中幾瀕於厄卒訪得實迎歸奉養同治年奉江蘇巡

撫奏 旌新纂

張淮字錦華粗識字為人收田租父邁心疾性嗜羊市割

者不食必特殺以進思出游則賃肩輿隨以待窮日而

歸及疾篤冀割肱療之父卒死 錢泰吉作傳

張廷標百福巷衣工節傭所入為弟納婦終身不娶母年

耄常效市中兒嬉戲狀以娛母一日隣家火負母出急

遷祀先之具不及他器用羣歎為合禮 同上

嚴焯字心甫例貢先世長洲趙姓嘉興嚴順吾貿易至金

墅攜其名文龍者為繼子居北麓坊月湄南數傳至焯

樸誠謙謹雖負販厮僕與婉言無忤色邑北鄉梅家蕩

巨浸也風恒覆舟醮金築堤冬代貧民贖棉衣服膺李

建章願體集閱歷所及附刻新增并刊力行彙編見聞

錄等書勸世 節張清泰撰行述

褚棨字芸門國學生習申韓幕游鄂客居麻城縣周家岡

咸豐三年粵匪躡鄉間棨宿草屋中賊瞥見曳之走忿

甚持鋤擊賊仆地忽門外賊麕至白刃交下遂被害事

聞 詔許祀鄂浙昭忠祠錫江蘇候補道杜文

瀾受教育恩賜封三品新纂

陳其耀字笛樓署江蘇丹陽縣典史卸事寓蘇賊警至奉

母避川沙城陷時裸負母匿蘆葦間荆棘傷膚如刻畫

旋為賊得不屈赴水死浙江忠義錄

溫瑞綸諸生援例以巡檢候補江蘇粵逆擾時派查揚州

府天甯門城陷殉難事載揚州府志新纂

周邦鎮字海樓議敘布政司經歷閬川鎮人庚申夏遇賊

不屈殞死郡城時其家傭朱同被擄為藁葬於北門官

倉旁地樹木識之克復未得脫以語其嗣作明訪瘞處

則地已為官屋樹亦無存走告於官立石以志楊象濟撰周君

藁葬記 馮寶三字子仙祖岱以文庠生精拳勇再傳至寶三幼習

鎗法結游俠咸豐己未薦鷹揚宴庚申郡城陷投三塔

灣張總統玉良營張師徒翫寇潰退石門寶三泗而免

往見石門守將吳再陞復舉團練扼賊羔羊堰天花蕩

迨再陞師奔而石門潰寶三乃潛歸鄉仍柵浜而守保

護新塍鎮不數月為鄉官誘縛送賊賊愛其材武釋而

遣諸許以金幣官爵寶三歸而殺賊如故賊銜之甚一

日微服過陡門為賊覺執而殺之 鄭鳳鏞新 滕瑣志

聞人填武生咸豐庚申春補試武闈試未已留撥操練局

二月二十八日省城陷陣亡 新纂

張松元宿字圩農民庚申郡城陷分踞聞川鎮賊日抄掠

松元率眾拒於謝河橋糧鋤鉤戟集田器為武庫相持

旬餘五月初三日賊廣至被縛刺而死 新纂

文苑

明

陳濟成化丁酉舉人授應天府學訓導遷鄭州學正再補

萬安教諭博學有達識談經史元元本本條舉靡遺弟

子聽者忘倦終蘄州知州 徵獻錄

范璋字朝秉成化庚子經魁甲辰會試副榜學問淹博天

文地理著龜占候靡不通曉著有靜遠堂集 秀水任志

范言字孔嘉嘉靖丙戌進士自蒲圻令改學博轉國子監

丞遷大理府同知致仕言博涉經史善屬文與里中彭

輅以文詞相頡頏范宗韓歐有體裁彭宏麗出入史漢

各負氣不相下說者謂彭橫肆而范馴謹著有菁陽集

劉志

鄒國儒字醕甫嘉靖乙丑進士愿恪有至行喜折節下人

不談人短以宿學授徒二十年始獲雋教弟子甚嚴肅

終日講席無倦容

秀水任志

仲春龍字原仁以國學生授文淵閣中書舍人善楷書能

詩文與李先芳莫如忠善王弇州稱其詩在襄陽右丞

間有九山樵子集

樵李詩繫

張正鵠字德中祖淮性忠實國子生考授峭峨知縣父桐

號鳳岡少好讀書外祖戴經無子鍾愛桐藏書千餘卷

授之晝夜攻苦益淹貫年二十七以察卒正鵠母諸同

里副使偁女也正鵠生而警敏偁教以經史為剖析疑

義靡不悟稍長能文中隆慶辛未進士授太常博士遷

南兵部主事乞終養補刑部主事歷郎中

徵獻錄

陳萬言字居一繼徵子萬歷癸卯領解已未成進士授檢

討為文深思掇闕力還正始兼通篆籀奇王數學著有

研園集

分省人物考參徵獻錄

宋鳳翔字羽皇萬歷壬子順天鄉試第一洞明經書理奧

文有根柢一秉先正四方以文投閱者不遠數千里而

至操選政與艾南英齊名

徵獻錄

李培字培之從唐樞王畿遊究性命之學以歲貢任上虞

海甯新城學博所至講學課士多所造就終龍南令著

有水西集項元滄休甯訓導遷英山教諭敦學行誨人

諳切得善誘方歸里後弟子不遠數百里就學其家

秀水任志

沈德符字虎臣自邠子萬厯戊午舉人生稟異質日讀一

寸書自兩宋以來史乘別集以及國家掌故往往能敷

陳其本末網羅放失勒成一家言頗資考證事母孝撫

姪如子不附黨援孜孜以汲引後進為任著有清權堂

詩文集弟鳳字超宗負雋才早卒董其昌謂自鳳亡余

書法無可傳子克家亦善讀書

明詩綜標李詩繫參吳志

屠肇芳字培之性敦樸文本經術兼工書初家貧服賈事

親天啟丁卯舉於鄉年踰四十矣司教蕭山與諸生約

三條曰根本曰風節曰學問一時士敦實行薦擢文水

令甫四月告歸著有四書孝弟編正文體說真寄亭臆

言太極圖說周易大旨

秀水任志

項元汴字子京博雅好古不習舉業萬厯間被徵不起席

豪貲天下法書名畫鼎彝玉石諸珍祕不脛而至獲古

琴有天籟字遂以顏其儲藏之閣辨別真贋析及苗髮

通八法六法書出入智永趙吳興畫山水學黃公望倪

瓚尤醉心於倪得其勝趣兼善墨竹梅蘭同時婁東王世貞蒐羅名品亦不遺餘力然不逮遠甚嘉隆以還宇內稱鑒賞家第一每以私印鈐書畫纍纍滿幅或識其價若干於尾又精心計嘗選匠授意造器具凡几榻架櫃奩之屬鐫以銘款皆緻巧絕人二百年來天籟閣所藏流散人間往往採入

內廷屢荷

天章題其遺蹟實異代稀覯之榮也子德新字復初亦工繪事得荆關法兼善寫生流傳少人得其片紙如棋壁

姜二西韻

石齋筆談參徵
獻錄及新纂

項道民字民逸元淇子幼韶慧能詩長益駿發時馮開之

李伯遠皆負盛名道民鼎足其間風華掩映人方以遠

到期之忽一日盡焚制藝逃於禪石磴繩牀終朝諷唄

不輟著有春暉堂集

樵李詩繫

項聖謨字孔彰元汴孫薰習風雅尤長畫董其昌謂聖謨樹石屋宇花卉人物皆與宋人血戰山水兼元人氣韻所謂士氣作家俱備者嘗自寫行看子自少至老題曰九十九變相圖布景各極其妙又作長江萬里圖最雄俊朱彝尊稱之至今流傳者短幘長卷上呈

乙覽輒荷

宸題兄子奎字子聚號東井亦能學元人山水兼擅蘭竹好用

秃筆水墨有晚盥堂詩學

書畫譜參張庚畫徵錄及新纂

卜不矜字竽公大有曾孫諸生性恬雅隱居嘯傲以詩文

自娛尤工曲律著有復觚集八卷併杖頭錢鴛鴦扇南

北諸劇

姚澣字公滌一字北若思仁孫廕太學生質直有至行好

施急友難千金無吝色崇禎丙子就試南都大會東南

名士束其文以歸有國門廣業之選一時稱月旦三試

不第遂隱居著述積書四十櫝部分類聚廣荆川左編

集漢至隋文為八代文統

吳元震諸生有品望為生徒楷模舉鄉飲賓季子治縣學

生負文譽貧無寸椽寄跡蕭寺積束脩所入以經營父

葬不以累其兄著有表章聖學四卷筆記六卷又諸生

唐文選字掄章有文而孝友知縣湯齊嘗表其廬子堯

岳年十二補弟子員博綜羣籍工詩古文辭及書法著

有剝廬集白芷吟孫珏亦以文學稱

以上秀水任志

姚繼華字鳳亭諸生性坦直博學強記著書經詳解禹貢

纂要九州圖說災祥占驗考諸厯纂要等書

吳志

卜世臣字藍水磊落不諧俗日扃戶著書有挂頰言玉樹

清商多識編樂府指南卮言及山水合譜孫休有傳

袁志

沈麋字天鹿少孤母胡授之讀及長博通羣籍值明未棄
舉業無進取志戚屬皆開府貴盛欲表薦之不就時與
陳繼儒李日華諸名宿以詩酒相還往當事聞名造其
廬謝不見家本饒初伯氏欲規估之麋泣請於母盡讓
其膏腴願以薄田奉母守約終其身後伯氏窘且老無
後麋仍爲收瘞曲盡其敬尤長於填詞康熙四十五年

命詞臣選歷朝詩餘錄麋數闕

香樹齋文集

朱茂暉字子若諸生以祖廕授中書好博覽經史諸子百
家靡不兼綜古文詞元本六藝韻語不屑蹈襲前人尺
牘日可百函華亭周立勳嘗云讀書能化臭腐爲神奇

惟禾中朱子有之所輯禹貢補注徐孚遠謂當與程泰

之傅同叔並垂著悔在先生集

靜志居詩話

朱茂曙字子蘅國祚孫大競子爲人恂恂儒雅篤於孝友

取子進退介而有節國祚當廕一孫以子茂曙不受叔

某富無子以次當嗣又辭之悉以推諸弟浙江巡撫董

象恒友壻也勸往不應少善屬文工行楷書能畫山水

竹石爲董其昌所稱明季棄諸生經史外旁及天文醫

卜諸書盡通其術

浙江通志

錢龍珍字松浚生而穎悟沉酣六籍著毛詩正義八卷解

歌二卷臆易三萬餘言做呂東萊大事紀邱瓊山世史

正綱撰史編史綱又著家鄉禮節四卷黜浮崇古鄉里

取法焉不事生產好施予生平無怒色卽非意相干怡

然也以子江貴贈奉政大夫

秀水任志

萬祚亨字元嘉諸生壽國子博學勵行中歲棄舉業耽情

山水工于筆墨杜門二十年著有臥隱閣集子人望孫

必大並善畫而必大子宏道字正思山水摹董巨筆意

人尤重之

秀水任志
參畫徵錄

吳洪珍字冲霄諸生性孝友與人交以誠工古文辭後以

子鑄登第遂不應試博考史鑑古今人姓氏分類成編

年臻上壽三舉鄉飲賓

秀水任志

陳泰甯字坤益學士懿典子少博學遇異書輒手自鈔寫

積數十冊先懿典卒著有尚書講義十卷

吳志

項眞字不損縣學生兼綜古今文爲李長蘅聞子將所激

賞書法絕倫有御史巡按至浙試士子文經書法題外

俾作一詩眞詩就以行草縱筆寫之御史拔第一益自

負儻募不羈坐事瘐死于獄

朱茂暘字子蓉縣學生擅詩文古風豪俊專師太白評者

比之出水芙蓉兼工書法著有鏡雲亭集及雜著若干

種

以上明詩綜

戚中岳楷法與文徵仲頡頏畫宗巨然筆力蒼老較之吳

仲圭略減清潤耳又朱素臣字去塵諸生善寫竹築室

幽篁間與名流觴詠其中曹侍郎勳贈句云道人癯似

竹遂自號竹癯

秀水任志

國朝

施博字易修爾志子明季諸生少篤學不事進取讀易至

家人卦悟聖道不離倫常日用乃一以務本為學教人

躬行為重不尚空談遠近有志斯道者聞聲踵至聽其

講論罔不感發平生遠標榜未嘗入社著姚江淵源語

錄講義若干卷

吳志參秀水任志案通志作施靜誤

俞汝言字右吉少孤貧力學具經世才乙酉後棄諸生嘗

館鶴洲朱氏甯都魏禧來寓倦園曹氏曹朱戚也禧因

訪汝言與論古今人物治亂得失窮十晝夜禧為傾倒

族父某富而無子汝言次當後族人或覬之遂謝去出

遊燕趙韓宋衛閩粵及雲中雁門胸次益廣歸而益著

書至兩目盲猶令人日誦書有所見口授使記之至老

不衰既沒禧表其墓著春秋平義十二卷漸川集十卷

京房易圖先儒語要明世臣考寇變略凡十數種弟子

吳之機字達可好學著述亦甚富周人急雖屢空勿顧

吳志參盛百二文彙

蔣之翹字楚穉少工詩採禾中先正諸咏為構李詩乘家

貧好藏書明末避盜村居收羅名人遺集數十種選有

甲申前後集又嘗重纂晉書校注昌黎河東集吳志

曹之璉字仲玉諸生博古力學敦品誼舉德行授徒數十

年及門之士多所成就纂有格言諸書行世秀水任志

蕭瑛字荆玉崇禎庚午副榜教授生徒多名士子壘字賡

六訓導敦行嗜古兼通醫理

施永圖字明臺由貢生仕至鳳泗道歸里後著五經四書

慧解歷代紀異及醫方本草諸書以上吳志

鍾欽立字宣遠前貢生弟于宮字恕雯諸生並長于文學

有警望欽立有信志堂彙子淵映字廣漢負奇才年三

十餘囊所著書數十冊入都與長洲汪琬辨論六經諸

史之源流詩歌古文辭之利病與自唐以來諸大家之

門庭曲折口哆目張洋洋纒纒數晝夜不休琬欲傲以

所不知而廣漢性甚敏識甚高卒莫能難越數日廣漢

暴歿琬為作哀辭嘗欲注五代史彙未成遺著尙夥吳志

參堯峯文鈔

陳忱字用直順治甲午副榜少孤力學為詩文質于曹侍

郎溶朱檢討彝尊得有指歸著誠齋詩集不出戶庭錄

讀史隨筆同姓名錄諸書子建燿諸生醅謹能文廷燁

有傳

毛延芳字石墨康熙庚戌進士善書法知新淦縣有惠政
歸里後恬淡自得寄情詩酒以終

陸泐字秋芳九歲能文十歲善詩歌聲譽出老生上子霽
字文端康熙乙丑進士知榮昌縣歲旱捐俸以賑

吳讓木字交樹樂清教諭耿逆亂後學宮鞠為茂草讓木
興復黌舍一新遷溫州府教授著有石堂詩集以上吳志

沈騅字無期少有雋才從婁東吳偉業華亭李雯遊文譽
馳遠近以諸生教授三十年門下皆知名士

徐世湜字中粹尚書必達仲子性孝謹事尚書得歡心訓
子姪必以禮讀書多手鈔所著有易參及明季本末諸

書以上秀水任志

陳彭齡字耆庚德元曾孫工文章與卜彭年相砥礪貧而
好學蓬華蕭然不改其樂陳鍾字西音貢生博於經史
尤篤倫紀友愛諸弟鄉黨嘉其行吳志

嚴勳字辰臣與兄觀弟臨有三嚴之目順治辛丑進士留
心經濟議論古今得失如指掌著有讀易堂文集觀字

質人以貢授訓導性孝友績學能文著有禹貢輯要臨
字覽民以貢授中書五經三史能暗誦著醒齋集吳志參秀

水任志

張雍敬字簡庵初名珩縣之新塍人多學尤長推算所著

定歷玉衡朱彝尊序之盛有推許語見經籍志詩豪俊
曰環愁艸又善填曲兼工畫伊志

宋瑾字崑友諸生研覃濂洛之書與陸清獻公隴其為友

序其四書大全授徒講學著有習是編教學圖又有養

正編識小集禮記集註治略芻言思位錄嘗遊闕里見

三教堂駭甚遂啟衍聖公毀之著闕里紀言後掌紫陽

書院教闡明理學有會講問答方正學年譜

沈大詹字伯遠修撰自邠孫與弟大遇字仲謀並有聲望

時三吳文社競起雲間婁上爭相延召大詹幾為黨累

晚年除遂昌訓導值耿逆亂變服匿深山為邏兵所得

叛將強以冠帶佯病不食卒吳志

馬上嘯字雪侑諸生父呈翼習青烏家言著有平洋元解

上嘯敦行通經善說春秋兼工詩著有詩法火傳左右

編及詩文集二十卷祀鄉賢祠子壽穀字佺其康熙壬

戌進士授武昌縣著有經書闡旨及瓶山唱和詩孫湘

有傳任志參伊志

沈善世字為九詩有雋才尤工於集杜藝林傳誦之同時

有孫昭字方回與善世相唱和亦以詞賦擅名吳志

姚東明原名節字竹友頤下有瘦晚自號贅翁任俠嗜酒

善畫能詩為朱彝尊門下士壯遊兩川三晉秦楚燕趙

南及百粵交益廣詩益豪邁著有弄酒餘閒集十四卷

吳江鈕琇令粵東以廉吏稱卒後幾不克歸櫬東明傾

橐助之弟元貞字梅友亦工詩有無可亭橐

伊志

王槩字安節寓居金陵畫山水學龔半千善作大幅雄快

取勢過於蒼健而冲和不足也善詩文有澄心堂紙賦

稱於時槩兄名著字必草以花鳥擅名得黃荃法

香祖筆記

參畫徵錄

屠友良字伊和洪基子康熙癸卯鄉試第一庚戌進士知

扶溝縣政務寬簡以德化民解組歸四壁蕭然舉瓶山

詩會以風雅為倡酬士林宗之

吳志

周蘭森字馥佩歲貢生工舉業兼古文辭駱琦字允文恩

貢生敦孝友讀書寒暑不輟琦與蘭森教授生徒並和

易善誘人人樂從之又卜垣字僧坦居秋涇里有學行

授徒皆知名士富於文為時傳誦

吳志

卜休字人木少孤十歲能賦詩經史過目不忘既長博極

羣書雖稗官野紀及方外藏典靡不研究善談論與人

辨古今治亂得失皆獨抒己見不少阿附家極貧晚喪

子每隆冬風雪洒窗擁敗絮從容展卷恬如也詩宗唐

音弟子李元繡收其橐

陳梓文集

盛大鏞字匏仲歲貢需次訓導好風雅有別業在南湖旁

曰匏菴集里中人為竹林詩社其詩初沿七子派後學皮陸晚乃似放翁常識錢太傅陳羣于總角時年八十

三卒

伊志

盛楓字黼宸明觀察萬年元孫未十歲以意為詩文不屬草頃刻盈數紙弱冠舉於鄉出睢陽湯文正公之門游京師諸名宿皆折節與交屢不第歸而閉戶著述念故鄉文獻無徵搜討有明一代人文自公卿以逮山林隱逸各為之傳題曰嘉禾徵獻錄本末犁然蓋楓少師桐鄉顏鼎受長而習聞舅氏朱檢討彝尊之論說故學有淵源性孝友尚風義補安吉州學正嘗一攝州事州民

樂稱其德所著尚有文集三十卷安吉耳聞一卷觀淵錄

十卷子支焯等有傳

李穆堂集參伊志

盛禾字既同天台訓導楓弟少游四方足跡所至凡川原景物碑碣陵墓搜奇抉奧不厭詳考嘗述其見聞事迹條分件繫積十數冊頗資掌故從子支炳字虎文以保舉授知縣改濟安教諭能文尤工畫得北宋遺意

伊志

朱丕戴字愷仲候選訓導年十四補學官弟子勵學能詩從祖檢討彝尊最賞之檢討選詩綜開局吳之慧慶寺丕戴襄其役詩婉秀不為鈎章棘句隸書學曹全碑可亂檢討真有亞鳳巢詩橐藕花居詞從子胡考字一

峯諸生少穎悟年甫壯卒著有椒園詩草伊志參強恕齋文鈔

朱稻孫字稼翁昆田子能以詩文翰墨世其家太倉王相

國揆為春秋館總裁引稻孫助稻孫挾其家藏二百七

十餘家之書以備纂修同館有意見不合者辨詰紛起

相國輒令稻孫平其可否又預修子史菁華書成例得

議敘稻孫赴友人李宗渭之難于關中比還期已過或

云銓曹吏可商也稻孫不肯遂不得選乾隆元年相國

子詹事奕清舉稻孫博學鴻詞復不得及纂修三禮臨

川李紱欲薦之有阻之者事遂寢性剛介不容物一言

非禮雖公卿滿坐輒慷慨義形于色遇故家子弟零落

不偶則涕淚不自持晚家居好以詩文會友齋厨蕭然

不介意書法自成一家所著六峯閣詩彙已刻者皆少

作又有續彙十卷擬古樂府三卷紀行絕句二卷羅浮

蝴蝶倡和詩二卷烟雨樓志四卷盛百二拙堂文存

陶越字艾村幼穎悟力學喜排纂遊曹侍郎溶朱檢討彝

尊之門侍郎有學海類編一書越因為續編若干卷又

嘗搜輯遺文撰嘉興人物考五十卷所著尚有錦帶書

月令摘華吟苑編珠過庭記餘錄數種詩文多散佚伊志

鄭世元字亦亭先世自越遷禾雍正癸卯舉人博學肆力

為詩宗少陵與俗寡合然朋儕子弟以業請者輒開譬

不倦陳梓謂其燭理如照犀處事如斷金使其得遇當

不僅以詩文見著有耕餘詩草子虎文自有傳從子炎

貧而豪于詩才敏贍于言立就而琢鍊精警時出新奇

著有雪杖山人詩集行世伊志

吳振武字威中有文名善寫生間作山水得王麓臺傳授

又嘗用指頭作畫花竹翎毛草蟲畢肖舅氏朱檢討作

長歌記之曾知寶坻縣罷歸賣畫以自給伊志

朱德滋字樹華諸生行已有繩墨涉獵史籍掌故勤筆不

休著聽和軒文彙又錢侍郎載之塾師曹櫝字元樞先

世自上虞遷秀水少孤力學舌耕自給泊然與世寡營

詩學唐調有竹鄰小草餘及繪事篆刻兼通醫載為誌

其墓伊志

賀光烈字經三雍正丙午舉人考授中書卒于官性端重

為諸生時閱張氏履祥遺書慨然曰為學不當如是乎

乃與弟光焜相砥礪酷暑不釋衣冠發憤窮經史尤研

三禮恥託空言自天文河洛律呂宗廟溝洫賦役算術

醫理靡不殫究著書十數種為文洞達理奧辨析古今

折衷貴當是時俗學以三代兩漢文字馬鄭賈孔註疏

不近科第屏弗視光烈獨奮志于古人初非笑之既而

生徒漸眾經指授成名者同里沈刑部昌寅編修昌宇

錢塘沈臬使廷芳其選也子基輩有傳伊志

張庚字浦山棄舉業學詩古文尤精繪事晚益研求元四

家山水氣韻深厚幾及麓臺間涉獵史書加以考核客

睢陽十餘年中州人重其學以湖北學使蔣蔚保舉應

博學鴻詞放歸生平遊歷公卿間多與賢豪長者交嘗

主吳興李守庚既去李署其室曰浦來軒望浦山之常

常來也其為時所推若此著綱目釋地糾繆畫徵錄強

恕齋詩文集若干卷伊志

祝維誥字宣城翼權孫性質約詩沖和有風度所居綠雨

莊錢載王又曾朱麟應暨其甥汪孟錡兄弟輒聚其中

為詩會丙辰被徵不及試戊午舉於鄉考授中書既終

養補官升典籍著有綠谿詩彙子壽字明甫舉人弱不

勝衣而好苦吟製小律鏤句琢字一語不輕下著有西

澗集伊志

嚴仔字肩吾弟任字季重並諸生書法肖董其昌為查宮

詹昇所許後有譚字先字作周貢生有學行工撥鐙結

體近元祕塔碑里人多從受教有述書絕句百篇同時

朱源字原長諸生入太學議敘授如皋縣掘港場主簿

精摹晉唐帖善做書嘗縮臨蘭亭聖教序如繩頭樣丰

神通肖從子振飛字南九亦以書名徑寸以下楷字尤

精潔能鑒別古帖辯入毫芒嘗以率更法寫李憩庵八
 十四法刻石以示學者又諸生錢德棻字眉客法在振
 飛伯仲間行押學李北海正書出醴泉銘而善變性瀟
 灑雖盜無儲粟吟間醉自若也夏之璉字宗彝諸生少
 後於錢亦工書學小歐道因碑無一懈筆伊志
 沈運宏字蒼育以歲貢生舉孝廉方正為嚴州府訓導不
 隳師範有退翁詩藁息簷詞鈔同時沈懋德字民滌舉
 人研覃四子書以制藝教弟子有渠度除臨海教諭子
 疇初字掄元有青谷雜著行世伊志
 凌大田字康伯六齡日誦千字雍正己酉舉鄉試第二人
 以教習選臨海教諭丁父憂補富陽母老乞養歸大田

敏於文能一日成十藝在教習館有求者立使者於庭

削藁與之著有豐屢齋詩文集四十餘卷伊志

王德普字長民好吟詩善寫生尤長墨竹得洋川法詩甚

富有竹堂詩略百卷不盡經意往往見佳句題朱買臣

墓云可憐無計留貧婦誰料他時是貴人洵乎老嫗都

解也伊志

鄭尙麟字悅山家貧能自振拔以舉人考授中書有詩問

八卷雜著數種子煜字曦如舉人德清教諭有紅泉藁

及他雜纂若干卷伊志

朱麟應字梧巢舉人品端而學優以博學鴻詞舉未赴里

中諸詩人自錢萬王三家外求其安章宅句足為後生

楷式者必推麟應擬張王樂府尤神似詞亦工隸書完

整而秀得漢法有賴業齋詩彙詞彙

伊志

蔣德字敬持鶴鳴曾孫乙卯舉人性疎逸不問生產詩麗

以則無虛憍氣刻有秋涇詩彙二冊門人故學士朱筠

序今尚書珪為之傳

伊志

卜兆熊字周望事孀母極孝嗜為詩有藕村詩鈔

伊志

吳光昭字翼心恩貢生源起孫少孤貧受母教肆力於學

為名諸生嘗賦銅鼓歌一千四百言學使李因培極賞

之顧卒不遇以老著述散佚惟賦彙錄要箋略行世

伊志

吳紹曾字魯也朱振咸又名辰應字載坤均諸生以古文

名紹曾文法歸有光計東一出以繩墨準尺年幼游楚

豫即為童子師養母數嫁文於人取其酬振咸每過之

尋積金葬親後有請者輒勿應振咸聞而歎曰吾固疑

魯也非肯攫諛基金者振咸少孤貧負狂名睥睨一切

特推服紹曾文亦追步韓歐著承訓堂文集

程同文密

齋文集

朱芸字正蕃諸生博學健于詩有雋氣乾隆乙亥以饑餓

不能出門戶卒有雁聲小草

伊志

陳元朗字星瀾雍正己酉拔貢入成均聞父病馳歸旋遭
 喪以毀卒學使帥公念祖有詩紀之嘉慶六年入忠孝
 祠並建坊郡城徐家埭子姓繁盛代有聞人得金佗園
 為別業從子經禮字慶旋進士知沅陵縣縣置郵凡五
 站值軍興旁午士馬芻糧支應費絀輒鬻產補之不以
 重累民大吏廉得實保陞永綏同知伊志

汪師曾字省三歲貢生餘姚訓導少孤力學為人謹嘖笑
 慎取與家貧授徒為食就試長安雖屢躋未嘗詭以求

遇伊志

張星字九野諸生詩清新脫俗越其儕輩中歲卒有玉李

詩草張敬勝字呂揚拔貢生少以詩賦稱年逾八十猶

國學生張楷字端如聞川人服賈養母耽詩五律有清

標近唐人格沒後友人為錄雪泉詩存四卷伊志

陳詩字韻清舉人為文根據經史授徒京師金部郎雲槐

暨弟修撰榜皆經其指授晚主徽州書院著時藝日飾

眉草韻語曰亦鳴草雜藝曰覆甌偶存伊志

汪大鏞字鳴盛援例選曲靖府同知調景東以銅廠事被

逮起攝通州歷順天府東路同知愛風雅雖歷處繁劇

輒吟詩作畫以自怡刊有綠雪齋詩稿伊志

吳芳字若愚號方谷郡諸生幼失怙貧而力學思顯揚其

親值母壽七十哀刻祝詞為愛日居壽詩又仿朱子白雲葬法倡舉義集為仁親會行之數十年工詩文著鳴

春集詩稿印月樓文鈔伊志

吳光酉字豐在甫成童即食餼乾隆丁巳貢成均為倪貢

士淑則贅婿因家平湖生平誦法陸清獻公食貧砥行

訂刊清獻年譜新纂

鈕景琦字玉海康熙辛酉舉人詩才鮮艷漁艇出桃花五

字春日舟行句也可作桃源圖又八月早寒一聯小院

苔乾蟲語咽空階葉落鳥聲愁亦逼真晚唐馮李詩繫續

馬學乾字行天貢生遊游荆襄掌教書院張太史問陶初

學韻語一見即許以他日成名著懷玉山人草繫續

李元繡字裳吉郡諸生父敏芬喜藏書不能購者借錄勿

輟吳江姚螯庵為楊園張氏高第延以訓子元繡幼即

端恪講書義輒穎悟一日問餓死事小作何解答曰不

餓死即失節矣螯庵深器之長益肆力於詩古文所著

簡古沖淡有法度尤潛心宋儒諸書游其門者氣質自

化故成名者多歿後私謚貞恪有澹凝堂集沈萃士撰墓誌見鄭

鳳鏘新勝瑣志引

嚴文瀾字芳湄幼孤力學屢躋名場乃閉門課子手纂宋

元以來易詩諸經解著有易詩異同折衷論詩以澹雅

為宗子珠璣皆聲雋巽序有三珠之目瑣志引斐亭詩話

張輝祖字似千嗣伯父雍敬為後諸生性耿介嘗苦新滕

事蹟廢墜旁搜博採著雜咏百餘首有方山詩草瑣志

沈叔埏號帶湖乾隆庚子

召試授內閣中書丁未成進士授吏部主事以母老告歸沉

潛經史工詩古文請業者戶外履滿猶子維鐫成進

士官至少司空弟珏號雲泉增廣生亦富著迷此傳應歸嘉興

陳增號梅軒學問淵博由進士授湖北長陽知縣制軍畢

沅委修湖廣通志沅刻書籍多與商權署德安府同知

以癩病改教回籍著有梅軒初續二集于志

陳經業字毓恬元朗子工吟咏與錢王諸詩人遊著有匏

村集

陳經國字泰揆乾隆己卯戊子二科副貢候選教諭潛心

經學著有讀易傳義會通三禮證訓春秋四傳糾正閒

齋思辨錄子孝恭號鹿萃乾隆乙卯舉人能文精醫識

沈濂於未達時操知大鑒積有遺澤子姓相繼登科第

新纂

李汝章字沁碧性高潔邁俗讀書不屑屑章句家貧服賈

以養為醫能活人同里錢載不輕交接少許可獨稱其

人與詩著有易解谿隱稿灌園餘事草子貞木號訥庵

以進士授山西高平縣澹榮利俸未滿卽解組改嚴州

府教授新纂

王曇號仲瞿乾隆甲寅舉人博通經史旁及百家負奇才

善道家掌中雷法左都御史某以曇薦會川楚匪起方

禁邪術薦曇者夙與和珅有連珅敗方引避曇亦被牽

不復振乃落拓江湖佯狂玩世著有昭明閣煙霞萬古

樓等集新纂

唐祝號蔗圃乾隆戊申舉人主講上海書院誘掖獎勸人

文蔚起登科目者倍盛於前肄業諸生爲之設主於朱

子之側著有周易實義六卷詩文若干卷子瑩邑庠生

兼通醫理著有五運六氣指掌煮花軒詩集子志

蔣元龍號春雨明經口吃心敏足不出里閭借觀郡城藏

書家搜覽幾徧詩格雅正得后山之神爲錢籀石侍郎

所推賞善鑑別字畫以楊梅紫液畫牡丹用草汁作葉

題曰天然富貴圖爲繪事中最風韻著有春雨樓詩十

六卷桃花亭詞一卷西齋過眼錄若干卷子志

張翀字晴鶴嘉慶甲子歲貢生讀書過目不忘博通經籍

兼擅古今文詞行廉志潔著曰湖草堂文集十卷詩集

四卷所見偶錄八卷子志

錢善揚號几山郡庠生載孫長於金石考據善鑒別工書

畫書法神似董文敏畫竹石花卉淵源家學得寫生趣

至今人多珍其筆墨著有凡山吟稿于志

汪世樽號寅禾如洋季子道光三年進士授編修操行清

潔惟以詩古文詞自娛與伯仲兩兄式好最篤九年視

學楚南十二年典試粵西十三年分校禮闈未撤棘而

卒年壽不永士論惜之著有閱史偶鈔玉杯餘瀝于志

計楠號壽橋廩貢生就職訓導署嚴州教授安吉訓導事

工詩初學王孟雅淡中年變而學蘇陸有自得之趣著

一隅草堂集十六卷雜著十卷道光三年歲祲捐資助

賑奉部優獎于志

夏儼號守白邑庠生人品高潔詩亦如之論者謂其富於

文詞飽於道義絕去摩擬剽竊之習近日之言詩者未

能或之先也著有清琅室詩鈔三集弟汝為工繪事精

篆刻于志

沈莘士號約安邑庠生少與兄涓士講學文法大家中年

客游四方足跡半天下與諸名彥相切劘吟咏甚富諸

體皆擅長五古尤勝著有新溪詩文集雜著十四種于志

朱溥號德涵孝子元子讀書穎悟有神童之目未冠遊庠

性孝友篤實與兩弟法夏閉戶攻書不問俗事著有書

經蒙引句解十卷弟浚號禹門夏號晴川皆有文名于志

朱聲希號吉雨庠生早歲食貧力學侍父疾以孝聞受教

於叔休度詩詞皆駸駸入右歷游燕趙得山川之助以

抒寫性靈業益進卒年六十一著有山礬山房詩鈔吉

雨詞稿俱付梓

于志

姚東升號曉珊世業儒祖應龍郡庠生品端學粹著有四

書五經旁訓父儼諸生著有儀禮旁註東升補郡庠弟

子員孝友篤恭資性穎異讀書過目成誦著有恒象紀

聞等書惜陰居文稿吟稿日鈔等集三十餘年鍵戶著

書寒暑不輟儒林望重旌德方維翰傳記嘉興沈維鏞

為讚道光十五年卒

于志

俞文行字力芟貢生力學著書有續貂性言十六章行世

并太平事宜一書俞沅字芷岸著有紹德堂詩鈔

于志

朱鼎鉉字楚正性孝友輯經補註私淑陸清獻嘗成理學

淵源錄詩亦近唐風格著有豐巖詩鈔

同上

黃如霖字奕山庠生本吳江北麻人遷居新塍之柿林遂

占籍焉生平精衡鑒書學坡公文宗熙甫詩有高達夫

之目

同上

徐昭字古愚乾隆甲子舉人著有古愚詩鈔嘗手錄五經

三傳周秦漢唐宋大家文數十冊晚年病痲二十餘載

臥一木榻得詩尤多

同上

楊景雲字芸客父柱字東林以優貢訓導宣平有柳村詩

藁景雲詩學溯源漢魏初涉筆蕭選後與王又曾祝維

誥游始變今體歿無嗣友人顧列星為選其遺詩耐冷譚

顧列星字退飛豪邁忘其貧寒甚友人贈以一裘過書肆

見有漁洋全集即脫裘換之家人笑其迂攤書朗誦勿

顧也著苦雨堂集夏儼為校刊耐冷譚

盛子靜諸生耿介性成嘗集友人結詩文社一日適不能

舉火有弟子素好携蒲偵知之持錢至卻勿受砥行立

名文酒讌中亦徵品誼新勝瑣志

朱杰字倫表居葭溪七歲居父喪哀毀如成人家故藏書

復得卜人木手鈔本數百卷肆力研索弱冠為詩文卓

然可觀嘗作座右銘有篤實沉潛居敬持志語蓋不欲

以詞章自域者惜不永年陳粹傳略

沈游號葭士貢生為錢文端器重妻以女孫性情恬退嗜

吟詠與計秀才漁溪結蘭言社所居耆英堂饒圖書花

木之勝嘗仿永和舊事倩戴秀才樹滋作者耆英堂雅集

圖凡二十二人錢塘吳菊圃重為作記撰有耆英堂集

續馮李詩繫

汪大經號西村廩生僑居泖上為贅茸城從沈沃田學詩

清新俊逸裘杼樓之後勁輯有江湖故人集齋味集及

詞雅諸選所著詩曰借秋山居同

汪雲字雪谷布衣終身不娶寄居蕭寺詩筆操縱自如於

及山人梅溪叟外獨標一幟有借春閣稿同

金汝潮號西樓由孝廉官山西澤州同知時方伯謝好華

飾見汝潮衣做裘綆下安如旒諷以改造爰歸就燈下

熱去蒙戎者翌日晉謁鞠躬曰今竟何如同官以其顛

手撼止之謝不罪也嗣出使旁邑題詩野廟中有軫恤

民艱語中丞初公見之曰此好官道途猶不忘民隱屬

監司善視之著有西樓詩鈔石瀨山房詩話

王家英庠生績學能文所著冰壑寒林館集錢塘陳文述

稱賞之工鐵筆善寫蘭竹刊有鴛湖漁唱詞四卷風調

不減杜樊川耐冷談

曹大經號海槎布衣隱於梅花涇詩筆蒼老尤工隸書詠

落葉有早識榮枯憑造化更誰茵溷判仙凡允推見道

之言所著曰吟秋館集同

章全字益齋歲貢生訓導天台縣學汲古勤劬影鈔宋本

樂書全部總千有二百餘葉闕兩載告成以潛說友臨

安志缺碑目一門偶經布肆得天下碑目鈔本亟錄臨

安金石自周迄宋以補潛志之缺吾禾老宿勤鈔纂者

夙推陸瓠尊筠以全繼之可稱雙絕錢泰吉曝書雜記

虞光祖號角山嘉慶甲子舉人臨海教諭熟精舉業所居

鄰賣餅家將揭曉與隣預約置粉餌隣伴諾不為意迄

報者至猝無以應里人傳為故事謂命中若操券可以

勵後學綈袍方履嚴於跬步善擘窠書畫本採入墨香

居畫識新纂

殷樹栢號雲樓附貢生書法遠師柳誠懸近叅汪退谷畫

尤高潔凡瓶罍樽壺之屬位置寸縑尺幅中別具雅致

家西郭外自號西疇桑者同時王湘字秋帆諸生錢采

字禮園均畫山水隱居城市間不染塵俗新纂

文鼎字後山布衣咸豐初徵舉孝廉方正力辭不就富於

收藏如商仲彝周象解漢元延銅稷帖五字不損本原

揚婁壽碑眼學精絕畫青綠山水宗文待詔派著有五

字不損本室詩稿諸暨周氏撰墓誌

董槩字樂間自號梅涇老農畫受石門方薰指授山水人

物花鳥草蟲各稱精妙尤喜寫蔬果點染生新書法顏

稽兼愛祝允明行草暮年構嘉會堂濡毫吮墨著有畫

學鉤元得其傳者諸生陳銑號蓮汀蒼勁秀逸著名濮

川新纂

唐堯字益庵綠谿山莊後人由增貢生保授富陽縣學訓

導赴任因病卸篆熟游閩省掌教臺灣崇文書院刻有

通俗字林辨證著蘇庵詩餘五種新纂

周錫蕃字椒邱由江西南豐改隸秀水幼稱神童以書生

熟金穀林文忠撫吳時參贊奏議林器重恒呼先生而

不名性友讓豐邑田產悉數歸弟俾奉祭祀遷浙無恒

產七旬餘猶掌度支應當道聘著有佐治續編新纂

包整號午橋道光辛巳科舉人由教習選江西德興縣知

縣宦囊蕭然主講嚴州壽昌書院服習語錄兼通釋老

新纂

沈之璵字寶之號寶樹先世自潯溪遷禾隸籍秀水弱冠

應童試詠各簪一花題有句云一朵當頭分綠鬢兩邊

齊帽插烏紗張壽山縣令大加歎賞嘉慶戊辰舉于鄉

屢上春官不第歸與二三知己月夕花晨飛觴拈韻有

旗亭畫壁風善墨繪於梅蘭竹尤精絕客居邗江者十

載藉舌耕養母詩益工哀然得六巨冊生平梗概具見

集中晚年刪定為二十二卷題曰雲暢樓詩草海鹽朱

方增序之未梓新纂

朱榮字欣甫道光丁酉登拔萃科選金華縣學教諭束身

繩墨婺郡士風本尙理學榮躬行倡導受業者變化氣質

允推人師新纂

龔璜字宜園小試三冠曹偶由廩貢任溫州永嘉教諭歸

闢幽居於北郭外殿基灣黎杖清游好施與鄉里間精
行楷雖暮年腕顫屏幃扇頓不吝人求詩本性靈有蠟

展亭懷古八詠樓晚眺諸作傳播藝林新纂

鍾樑號山橋增生終身不娶取與極介有女弟名惠珠能

繪事適張熊畫家老宿居郡城斜橋樑或歲暮信宿亦

不時至搢紳爭延之一入館如家焉工駢儷新纂

姚仁瑛號子白狀魁偉學行純篤壯歲有聲黌序長白瑞

元守禾時目仁瑛為高才生居郡庠西偏擅園林小築

有懷芬堂額猶存竹垞手蹟家中落橐筆遨游庚申避

滬歿有懷芬草堂詩稿節楊象濟撰懷芬草堂詩序

計光炳字曦伯性高尙厭舉業孝事二母雖孺捕迷藏之

戲亦舉以娛親親疾卽戚容稱水量藥必手檢慕石田

南田品高志潔自署其齋曰二田藏書六千餘卷校刊

族祖棗村遺集為里人錢彥臞刊脉法一書風雅主持

又喜搜藏書帙遐方文士造訪者羣集小滄浪重結詩

社有守璧齋詩詞集子館孫力學貢成均有辛畚書屋

詩稿見計氏家傳

周閑字存伯居范蠡湖先世皆武秩閑援例知江蘇新陽

縣事性簡傲罷官後賣畫餬口不干要人壯歲留心掌

故府廳州縣志書搜羅過半諮詢遺獻爭造其門垂老

無聊託詩見志著范湖草堂詩文稿新纂

鄭瑞清原名熊光號霽山廩貢生藏書宏富目睇手纂留

心象緯兼參西學中年目擊時艱講求經世撰平賊略

長篇惜無上之當道者有求是齋易說雜文詩集松風

閣詞各若干卷北窗雜誌天星一覽諸稿新纂

王相號雨卿祖錚字鍊邪性恬澹巡檢歸仁遠拂衣退父

某幕江南北晚設質肆於桃源遂家宿遷相少棄舉業

為詩古文辭以經濟客諸侯倦游歸營百花萬卷草堂

閉戶嘯歌有無止境存藁新纂

隱逸

明

郁從周字泰初幼神骨清爽吟詩鼓琴登嘉靖己酉鄉榜

再上春官不第即棄去嘗遊南嶽遇異人有所指授後

張紫陽授大丹訣乃還武林賣藥市中人無識者浙江通志

周履靖字逸之萬厯中布衣築舍鴛湖之濱種梅百餘株

吟唔其下人呼為梅顛與妻桑偕隱倡酬劉鳳為作貧

士傳訂金石篆隸及所著詩文皆有根柢袁志吳志參

戴鳳儀字次泉諸生兄鳳翔官吏垣未嘗以寸牘謁當事

隱居白苾村杜門絕俗研究理學著詩經纂義秀水任志

朱崇儒初愛老莊已而潛心程朱為博士弟子尋棄去遊

戲筆墨間入神品為人豪宕有簡兮玩世風

吳志

殷仲春字方叔隱居教授兼岐黃葭牆不蔽風雨與禾中

高士高谷傳姚叔祥郝伯承王子逸釋秋潭為詩酒之

侶遇顯者輒引避所著有醫藏目錄棲老堂集子志伊

亦有學識

袁志

陳邦俊號白石子諸生負才好客多與名流往還晚遁跡

西郊茅屋數椽孤松片石擁書自娛聘修縣志有懷金

求作傳者峻拒之著有見聞紀異兩窗雜錄廣諧史明

代異人傳歲時記惜多散佚

秀水任志

陳堯德字安甫卜舜年字孟碩皆負異才相友善為人豪

宕不羈隱居放言世以狂生日之堯德有安甫小草舜

年兼善書畫有雲芝集

秀水任志

吳麟玉字稚貞少負才名放浪詩酒家有小圃栽竹萬竿

構數椽隱居其中題為琅玕社與陳繼儒釋智舫倡和

晚喜種梅調鶴自號澹雪翁有醉月軒閒吟草

浙江通志

鍾晉英字麗璠博通經史以泉石自娛喜汲引後進吳中

名士多以詩藝就正

秀水任志

吳統持字巨手弱冠餼于庠文名藉甚崇禎中與妻項偕

隱鴛湖焚香讀易饘粥不繼嘗賣卜徧遊齊魯燕趙稱

胥山樵子著典林十卷明月樓集項名佩淑且才有藕

花樓集

浙江通志

朱之佐字子襄九歲應試少孤苦事母以孝聞歲饑出力

勸賑閭里德之崇禎癸未進士例得選不赴日藝竹栽

花陶情詩酒有和陶硤遊諸集

秀水任志

顧鳳正字聖徵副貢生礪行績學天啟中辟賢良方正不

就聞國變失聲痛哭病遂不起有濟荒書榮樹堂集仲

子瑛繼其志以詩畫隱詩出入陶韋畫山水宗北苑花

草翎毛有黃荃徐熙筆意

吳志參秀水任志

高澈字公鑑諸生性好積書几案間雜陳法書名畫尊彝

古硯摩挲玩賞幾忘寢食乙酉後貧甚籜冠荔服屢斷

炊煙與長子履日染翰臨摹怡然自得有藝苑雕雲松

繞廬諸集

秀水任志

國朝

陳恂字子木明季舉人名仕復社鼎革後杜門奉母薦舉

不出為浙西四孝廉之一著餘庵雜鈔子英字堯夫諸

生康熙己未薦博學鴻詞未赴試著有秋雪集

鄭光祚字四維原籍餘姚遷秀水善天文明末時隱居梅

花涇友人招赴省試作老女辭見志授徒教學不履塵

市自號碩果山人年八十卒子典字子韶孝友工詩著

廡下吟幽湖集嘗有廣陵古跡詩為王尚書士禎所賞
 項觀國字子賓潛心理學鍵戶著述造就弟子多成器項
 以淳字長孺棄舉業避地以詩自娛號古村老圃有邨
 居集蠹餘草洗硯篇秋水倡和詩

張鴻字遵渚隱居九里村教授生徒皆知名士姪楨字端
 士亦力學敦行以上吳志

沈起字仲方明末諸生說經不沿傳註每自出意解聞者
 解頤後入東禪寺為僧名銘起嘗擬撰明書謂明不亡
 于流寇而亡于廠衛自成化十二年秋始至設西廠止
 又著有太易測詩選春秋經傳引四書慎思錄及學園

集謝志居詩話參吳志

吳從龍字九生素精韜略從總督張存仁征閩授參軍為
 水路先鋒攻仙霞破建甯有功張既移節去從龍辭歸
 躬耕田間不復出著有蕪香藁吳志

錢應梅字玉崖市隱賣漿晚年宰肉韭溪橋或賣卜七星
 橋人與談詩輒閉肆下簾竟日不倦有同在郡城能詩
 者郁心哉字秋堂時往乍浦以沽菽乳為業自稱粗糲
 腐儒徐熊飛錦囊集又見橋李續詩繫

張岳鎮號晴麓布衣家貧愛栽花室中金鑑外無長物常
 語人曰少殊自負今老且無子花而風焉將逍遙於是

鄉矣因號風然居士風然者仙花名也著有二欲齋詩

鈔同上

陶瑄字梅石菊隱裔居長虹橋東甸上出門不數武烟波

萬頃遠樹遙村盡供詩情繪境嘗攜友櫂舟小滄浪觴

咏為樂握管寫生步武南田秀韻獨絕著綠蕉山館詩

集李王猷聞湖詩續鈔

藝術

明

滕雲鶴號道軒沈懋孝有贈滕醫士序云歲辛卯夏余女

弟忽患寒熱日沉暝雜投不效七日幾絕急迎道軒至

木強已三日矣察之曰此乃風入太陽痰迷心竅病名

曰瘧靈樞論之詳矣其症當角弓反張其初必于產中

受風邪入血脉數年始發必曾微見顛眩狀詢之乃知

自產後閉月事者七年今歲三月忽仆地而遽醒越宿

果反張舌強齒噤藥不下咽則以牛黃硃砂等微從鼻

孔進拒不入再三進乃入僅涓滴三日目始瞬七口

微開手足始蠕動旬日外微出聲知疴癢漸進藥液竟

得活於是一時傳以為神

浙江通志

陳詩字鳴唐世精岐黃每投藥輒與主人約某甲某日愈

某乙某日愈皆不爽以術活人不望報雖寡人下隸未

嘗靳往也

石涵玉字啟秦治痘有奇效一小兒痘不起面青腹痛涵

玉憂之夜夢大士曰何不用白芍乃悟白芍能于土中

瀉木面青腹痛木乘土也如法治之效一女痘陷眼白

色紅面如灑脂涵玉曰內潰不治取紙礮一令其父燃

耳畔驚之痘盡起眾問之曰內潰以通竅為主驚則心

竅開痘不伏矣平居長齋放生施棺買地置廣孝阡以

葬無力者子楷諸生益精舊業名動公卿間

黃鼎字雲公性穎異博涉羣書遇道人與講義經祕旨遂

精錢卜多奇中羽衣籙冠翛然自適著有占驗錄五行

總裁

以上秀水任志

王應芳字蟾采隱居種梅善治匏器每語人曰破匏為尊

太古制也自號太朴山人後有周五峯治匏器亦工每

歲種匏霜落後摘置几案間樽爐餅碗相其質制之色

瑩香清天然可愛同里陳處士茨作匏器歌曹侍郎溶

和之

袁志

國朝

馮蘊古生明季穎悟絕倫順治初忽習醫卜術每出游歲終而退咸未之奇也康熙壬戌春徧詣戚屬拜別云當以八月八日辭世遂自營窀穸及棺槨衣衾衰麻之類並與僧道雜役訂期先子之值羣疑其癲至七月果病如期而逝

瑣志引馮浩橫塘紀聞

施濟字汝舟恬雅以畫名杜宗伯臻巡視閩粵海疆屬濟繪圖以進名益重子蘭字楚求得其傳同邑姚敏修字

遜公亦善山水亞于濟

秀水何志參畫徵錄

許慧字念因業醫善花草用意在山泉舜舉間而自成一

家每寫長草葉好作一轉若結者頗有別致

周銓字巨衡工花鳥尤長荷鷺人號周荷弟況字叔黨覽字元覽皆工畫覽天資穎異童時與仲兄況同伯兄出潛取其所臨古圖摹本焚之曰畫須自出手眼何蹈襲前人為每畫必對花寫生曲盡娟妍之致

以上畫徵錄

周困字廷三銓子亦工繪事宗南宋畫院派性耿介家雖

貧非知交購其畫不易得也

伊志

劉尊光善岐黃相傳遠祖業醫故俗有火藥劉之號自南宋時因御呼得名言用藥如火之神速也尊光孫堯字祝三克世其業能治奇症乾隆間有司屢旌之年八十

六無病卒 伊志

沈江字岷源官太醫院以母疾告歸貧者延之輒徒步往
遇疑難症每中夜不寐設法治之善自修養晚號抱元
子預知死期與親友訣別沐浴逝著有奇症匯等書 伊志

朱英武名德昌以字行年十六不知所往數載歸精太乙
壬遁之術嘗授徒陳氏盜夕至英武以術禦之盜自相
殺而退後夜遇盜於荒塚間突出戮以鎗傷鼻人因呼
為朱爛鼻居新塍鎮不娶不茹葷灌圃終其身英武與
人談必勸以孝友求其術不答年八十無病卒卒之頃
曰白金三十兩付其鄰曰待我嗣子來與之翼日未殮

嗣子至鄰出所付金而匿其三分之一忽張目曰何不盡
與之及舉棺棺若空人以為尸解云 伊志

章魯璠字上珍隨父往西鄉診視遇農老與言知精醫者
叩授數秘方且誠曰醫養親濟人非牟利若利令智昏能洞
澈人癥結乎詢姓名不答後技精療竇學使光鼐疾為
書額志恒堂踵門以贈著保幼心法慎疾要略兩書孫
廷楷字維楨少孤患痘母懼觸忌飲井水成血臃長知
之禱神求方神賜咒誦百曰孝感愈母疾且世其業

錢經綸號彥臞住王江涇性狷介精醫理深得古良醫奧
旨多著奇效遇貧乏不能具禮輒造之數往無倦容倘

非其人雖多金不能致也歿後里人立小祠祀之著有

脈法須知三卷子志

姚揆號書城父敏修工繪事揆能世其學善人物花木父

子俱載畫微錄子志

周之璜號西範廩膳生工岐黃術治疾多奇效延診者不

計值遇貧者每卻其貲兼調以藥事親孝父沒事母益

謹兄弟友愛弟珩多逋負皆為代償不使親知著有壺

隱詩鈔六卷子志

周以濟號魯安國學生由嘉善遷籍秀邑住王江涇精岐

黃術凡劇病他醫束手獨能奏效於時感尤能應手速

愈有半仙之稱子志

錢善繼號成甫邑庠生精醫工詩著有卓齋詩詞稿子志

陳球字蘊齋諸生家貧以賣畫自給工駢儷喜傳奇嘗取

明馮祭酒夢禎敘寶生事演成燕山外史事屬野稗才

華淹博墨香居畫識稱其善山水新纂

徐世綱字鈍庵諸生人物得陳洪綬逸致亦擅山水花卉

書法篆隸兼能蝨隱園書畫雜綴

吳球字禹錫畫師藍瑛摹子久小景頗云入室吳鈞號墨

隱山水得井西老人法通醫理善靜養畫史彙傳

吳履字竹虛號瓦山少不甚知書壯游山左歸能詩多奇

句字學鄭燮精篆刻工繪事涉筆蕭遠尤長於竹嘗作背立圖謂我看不得人人亦看不得我其玩世傲物如

此在山左與黃楸穀齊名著有苦楸庵詩

新勝瑣志

朱彝鑑字千里彝尊弟善畫精篆刻朱振祖字繩武彝鑑曾孫指墨花卉生動可觀楷書宗歐陽度曲自諧音律

研硯田齋筆記

周封字于邨廩生博學工文善丹青墨香居畫識稱其秋

山聽瀑圖筆墨蒼秀阮文達視學兩浙文藝外間試六

法封輒冠曹偶魄力雄厚最以巨幅見長

石瀨山房詩話

范安國字治堂祖籍廣陵僑居郡城韭溪橋旋補博士弟

子員卽食餼名雋一蠶凡琴棋八法方診堪輿悉能心

領神會鐵筆尤動與古合晚遇親串委代理財持籌歲

久不欺一錢其親感激至願分潤乃富購書簞有坐擁

百城之樂

飛鴻堂印人傳

曹均字大同號平階先由上虞籍遷來幼孤露母吳通經

籍能詩文以十指供家給教之成立餼於庠復與優行

嗜金石工八法見舊石刻及前賢墨蹟雖無資必質衣

易歸昕夕臨摹篆刻宗秦漢無時俗纖媚習

同上

金學堅字成峯山水宗元參宋私淑王軍貧而能守不爲

豪勢所屈

畫徵錄

許慧字念因號笑仙寫意花卉合山泉舜泉而成家疎老

可嘉每寫長草葉作一轉若結者頗別致畫徵續錄重見

夏穎字稼民布衣蘭竹天趣橫生筆勢超逸兼善花卉工

吟詠能鼓琴蝶隱園書畫雜綴

陶淇原名紹原號錐庵書法二王字宗文惲遊游漢陽滬

瀆間得江山之助詩境蒼莽有忠孝堂集題跋尤得蘇

黃神髓傳弟溶號鏡庵善翎毛草蟲同時王坤號瘦石

性傲兀畫法王翬得淇指授益進新纂

朱熊字夢泉晚號墨禪居士精篆刻善花卉性孝志潔庚

申避地苜城舟居鬻畫以自給墨林今話

計芬字儋石善六法人物師金農花卉出入白陽南田奇

橫處神似青藤其里人沈玉垣師之玉垣尤工山水雄

厚絕倫字夢仙著白紵山人稿新纂

楊九牧字蓮峯江蘇南匯縣人本姓龔少孤受撫於楊楊

乏嗣遂承龔楊雙姓得異人秘授以岐黃濟世有瞽者

求治取鍼開之撥轉瞳神光明如故尤擅長瘋癆臆膈

雜症故汾泖以東老幼婦孺就醫者踵相接焉雍正間

設同善堂藥肆於禾城北郭外時錢太傅陳羣足患疾

投藥酒瘳贈聯云功深九轉丹成鼎病卻千人藥在囊

乾隆年龍虎山天師張存義身患偏枯療之贈人世天

醫額天師精堪輿命立石佛塔前以鎮宅嗣後遠鄉就診者遂以石佛為記識嘉慶年入籍秀水今其曾孫增

貢生奎克繼其業

新纂

黃石字秋浦居謝洞里山水仿陳白陽家綦貧以筆墨自

給故所畫皆佛像藏僧道家為多

新勝瑣志引
新溪雜詠

陳其殷字拜璜居福德坊之祥里善畫蘆雁金石文亦蒼

古館蘇范氏歿後篆刻墨蹟吳門極有珍藏之者

同上

王斌字師周寫真筆意澹遠子肇基字鏡香花卉禽鳥秀

韻天成兼工寫真

畫徵
續錄

沈紀字聿修從曾鯨學寫真子松年字季申寫真兼山水

篆刻圖章皆自鐫古紐

畫徵
錄

朱廣陽住園田挾富貴膂力絕人延計彥如為師計得少

林派無嗣老於朱氏故廣陽盡得其傳嘗以一掌劈牌

坊柱石立斷人呼為朱石柱云

瑣志引屠汾
新溪備考

朱孟堅字兼白府庠生精醫理與同里陳孝廉鹿萃合註

天士臨診指南痘科尤擅名所用藥物非果菰葉即珍

饑吐棄本草恒品以時流治療疾多誤用北沙參涼味

辨論指迷治痘貴察色自中年省闈被黜飲泣盲目用

手摩抄即決吉凶無爽壽至九旬有三痘科醫案及詩

集均燬於兵燹

新纂

俞浩明字超英紹人住甘科街父虧帑項積逋窘甚卜諸
 日者勸習岐黃苦乏脩脯從師乃涉獵方書急售術輒
 驗蓋天生也生平遇一稟症市心術朱姓昏迷七晝夜
 室燈暗如豆俞至病魔若遠避投清心劑即愈春波坊
 業酒姬譫狂擲器眾莫敢前俞切脉佯退借鄰家書虎
 威吸鐵石羚羊角淘鵝油作餅餉食之頓下塊血二豎
 患遂息北鄉李姓頭骨嶄然起如角肢體漸倦係腎氣
 外洩用鹿茸為君藥骨遂平鄉婦兩乳忽長尺許症名
 乳卸陽明虛法用歸芎乳縮如故先是鄞人吳浩然醫
 集眾長住北郭外聲名噪甚在城出邀者每導令赴俞

曰吾與若技均於是有城裏吳浩然之目纂

張彪字翰如少結游俠精拳勇能騰身貼壁或頭足着兩
 几中空而鼾睡設酒肆塘灣街糧艘水手使酒踞櫃坐
 張佯以巾作拭櫃狀坐者已標出門外去他人治傷尙
 藥力張純以巧勝一婦弓鞋滑足從梯初枕墮傷環跳
 穴避嫌難用手乃令端坐狹木櫬背以栲栳仰承之拍
 肩使翻身團坐齧已合筋少年被毆傷腎囊膚全脫宰
 雞取黃以冷水澆病者頑噤則丸縮伺縮半急以黃裹
 之藥敷口即膠合若折脛斷脅尤見本領有陸禹門者
 跛脚坐旁有囊荳疾趨者脫肩壓其股膝骨下垂又有

肋骨受傷十二年捫之痛徹心漸彎向內均以生平運鍊柔克以治之性慷慨且存救世心不受酬故較城中

嚴氏接骨尤陰行善云新纂

郁文普號正飛布衣住南張浜閘村學究訓蒙字音不分

陰陽清濁乃舉五經字依三十六字母分別部居作子

母字彙字母証新纂

姚鑑字鏡侯王江涇人學醫於妻父朱聲雷朱多蓄宋元以來諸家書鑑盡發而讀之故治病能據經典依古法多有為時人所不知者年六十餘著有傷寒合璧二

卷集方一卷

流寓

明

施懋字以德應天人能詩文書法學東坡以鄉貢授龍泉

教諭改北畿武學訓導陞孝豐縣致仕官無餘資挈妻

子寓秀水之醋坊橋懋嘗從侍郎戴簡庵學乃與其子

經為忘年交往來益密遂相依而居秀水李志參 浙江通志

康太和字原中莆田人少負才名嘉慶乙未進士官翰林

三十年歷南京少宗伯及大司空致政歸避倭僑寓禾

郡與吳太宰諸公遊有禾城集浙江通志

國朝

王益朋號鶴山仁和人卜居秀水之秋涇乙未二甲進士

第一人授庶常改給事中時鎮臣潛通海外為心腹莫

發其奸益朋密疏請檻致以正軍法直聲震於時擢掌

吏科值大計嚴絕餽遺陞太僕少卿卒于官著有詩文

集黃門奏議

秀水任志

陳祚昌字奕大由仁和遷秀水乙未進士歷任刑部郎恤

刑畿輔申雪冤滯調知揚州有惠政

宋昱字懼聞紹興山陰布衣康熙戊午舉博學鴻詞不赴

遷居秀水極貧有故人為制府勸之仕謝曰是只願讀

書耳徒步謁孔林歸作詩十章年八十卒

以上吳志

陳潢字天一錢塘人寓郡城有經濟才參總河靳輔幕議

改築清水潭隄議移南北運口以防淮決黃淤又議鑿

中河俾往來舟楫去險就安凡數大舉皆潢策也會

上巡幸江南閱河以得人為問輔奏潢名敘其功

特授贊理河務僉事道盡瘁而歿

秀水任志

潘澣字起濤越人寓于禾少工篆刻長嗜書窮日夜流覽

又善吟咏嘗手選楊誠齋詩序之出入懷袖不置蓋其

專好也年三十餘卒友人陳梓為作傳又潘佳晴字快

雪松江人寓金明寺三十年卒于僧舍詩學義山書蒼

秀得蘇米法

伊志

沈用濟字方舟國子生自錢塘徙禾南海梁佩蘭為賦鴛

湖別業詩用濟足跡半天不詩多邊塞之作一時名流

莫與抗行將老遷去長洲沈德潛序其遺詩凡十卷伊志

陳梓字俯恭餘姚人遷濮院不習舉業嘗私淑張氏履祥

之論說撰四書質疑以教授學者通六書作草字學懷

素小楷用意處乃絕古雅詩與北地李隱君錯齊名有

南陳北李之號伊志

金德瑛字汝白號檜門祖籍休甯遷杭州入仁和邑庠為

秀水汪氏壻讀書金佗園遂家焉雍正丙午舉於鄉旋

舉鴻博乾隆丙辰

延試第一授修撰入直

南書房分校北闈者一典試江閩者四視學江西山東順天

者五充

殿試讀卷會試總裁者各一初任江西時奉

旨金德瑛操守甚好取士公明著再留任三年嘗奏請加賑鄒

滕飢民徐克水災宜復黃河故道

上曰德瑛不欺皆奉

旨允行德瑛性孝友置義田建宗祠創立休甯會館于京師鄉

人至今德之官至左都御史卒祀鄉賢著有檜門詩存

伊志

其家藏有梓
湖工體用章
頗至其論梓一
極不信以之說
益亦卓識之士
年遂舉湖上
見有梓湖上
學博美善博
日下及購字及
月一

陸燿字朗夫原籍吳江遷秀水乾隆壬申舉人考授中書
歷郎中出知大理府母老陳情調登州陞西甯道又請
奉母入京供職

特調山東運河道講求行水成法輯運河備考六卷創蒿庵書
院以祀張爾岐壽張王倫作亂河督率兵助勦燿守濟
甯募鄉兵及義勇于餘擇里人統之授以方略或議閉
城守燿曰鄉村皆赤子何忍棄之城外乃洞開重圍使
入而身坐門間稽察之賊偵知有備不敢近擢按察使
盡心斷獄著濟南信讞四卷及急救方洗冤錄節要甘
薯錄諸書攝藩司事奏停加捐分發之例尋乞養歸服

除

命監辦運河隄工補山東布政使旋擢湖南巡撫請定各官終
養例以杜規避而廣孝治又請廣嶽麓城南兩書院肄
業名數又湖南有社倉未納穀者三十餘處民僻阻山
水力不能輸請停收免民累並

允行時方倚重遽以疾卒少勵學中年棄詩弗為政暇博涉經
史百家言廣採

本朝各家文取議論深切有補人心世務者為切問齋文鈔
三十卷大學合鈔切問齋集十六卷傳於世

伊志

陳淦字揚對號鐵巖又號養素居士海甯人年十一善屬

文筆意端重乾隆辛酉舉於鄉史文靖薦授國子監助教京察當以直隸州用不就戊辰成進士改庶吉士授編修充武英殿提調國史館纂修通考館纂修官陞右中允轉左晉侍讀左遷復保舉御史引見記名以繼母熊春秋高引退母病篤時公年七十率諸弟姪侍奉中夜必數起居喪哀毀倍常庚子

南巡駐蹕安瀾園

賜陳氏子姓各緞疋公獲

加賜雙端以父閭齋所輯賦彙題註進呈蒙

恩嘉獎性溫厚少受業願侍講小崖之門理學專家深相契洽

因盡發其祕卜居郡治與二三至好蒔花種竹官吏絕不往來年七十五卒所著有清餘堂詩文集次子愨字高翼太學生績學工文爲曹劍亭副憲婿當曹參劾和坤時奉

旨赴熱河面訊親友無一人肯往愨隨行往還跋涉曹卒於京

子幼爲經紀其喪歸里所受分田產爲伯兄耗盡無幾微怨色課徒度日丹黃不倦年八十二卒

子志

方潔號治庵台州黃巖人僑居禾申折節讀書工詩善畫尤精竹刻見者歎賞以爲必傳之技張孝廉廷濟爲作

傳

子志

江涵燉原名秋號筆花歸安人僑居禾中嘉慶戊辰進士

官廣東會同知縣以疾歸貧乏不能自存素工岐黃術

仍以醫道餬口著有醫鏡奉時旨要于志

肅瀚號潛齋江蘇丹徒人徙居秀邑銓發廣東鹽知事親

老不赴性仁厚喜施與郡城有善舉皆與焉周困乏惟

恐不及耽黃老之學深通元理著語錄數千言于志

徐懋學號竹牕德清庠生援例就鹽運司通判嘉慶元年

僑居禾郡平生敦族誼慎交遊專精史學郡中諸善舉

皆與其列子彝承號石琴詹事府主簿稟承庭訓讀書

儲經濟道光壬寅海氛熾郡城騷動上防夷策五條尤

嗜讎校史記前後漢文選及蘇詩均有評本於許氏說

文多所心得段註未安處補正若干條他若書畫金石

文房古玩賞鑒款跋稱精當餘事工圍棋度曲時或引

商刻羽放浪湖山以為樂癸卯修築郡城并激浦礮臺

捐緡錢親畚掘利濟鄉里交口賢之孫傳經傳政亦能

世其業于志兼補纂

孫世禮號月航杭州人寄居秀邑工楷善古文由河工

議敘官河南孟縣知縣以軍功擢陳州府通判頗著循

譽人以爲無忝簪纓世胄云于志

陳崇禮字敦厚號梅亭海甯州人嘉慶元年以州同投効

湖南軍營委解軍餉往來辰沅間不避艱險事平奏請
議敘以原銜簽發四川試用教匪事起調赴達州軍需
總局時相國托津以副都統總理糧餉延入幕府勦辦
諸務借補甯遠府經歷仍留達州升琪縣知縣甫下車
廉知有生員廖某爲姪誣陷沈獄中十二年訪確卽予
出獄并爲請復衣頂一時有青天之目調署安岳縣事
有武生廖洪以軍功恃符滋事詳請斥革書院久經廢
圮基址狹隘捐俸添置旁地重爲修葺調任鄰水旋署
眉州直隸州重修三蘇祠宇清理老泉墓界令其後裔
世守陞石碭直隸同知向爲明土司秦良玉地被教匪
滋擾爲脩祠宇清祭產署江北同知丁父憂服闋補雜
碭同州卽古維州地甫蒞任而阿蘇拉野番滋衅奉調
赴甯遠督辦旋陞甯遠知府地鄰滇省五方雜處凡滇
省銅鉛皆由此採辦廠丁人衆多偷漏嚴督廠員銅額
無虧會果治克夷匪蠢動調辦總理軍需事平奏

聞

賞加道銜調成都府不一年

特擢建昌兵備道旋授長蘆鹽運使司裕課恤商授直隸按察
使矜慎庶獄陞直隸布政使

特調福建布政使抵任未兩月以足疾復發乞病回里道光十


八年八月卜居郡治姚家埭于志

李華清號補未原籍江蘇嘉定縣父賡芸守吾郡惠政清風口碑猶在嗣擢福建汀漳龍道以朱履中獄被誣自盡逮平反寃雪眷屬歸膠城又為族眾所凌無以自存遂棄舊居卜宅郡城報忠坊楹有傳書家無儋石以諸生援例授鹽經歷著善補過齋文鈔子用光籍秀水由歲貢選授分水訓導新纂

張建謨字嘉言吳江庠生砥行劬學喪偶不再娶造就弟子舉業外兼論古體文及門沈曰富尤以古文辭名世始寓金陀園昭文蔣霞竹為繪倦圃讀書圖喜為詩有

鴻閣聖雨齋問花樓名著經藝熾惟仲湘刊留爪集存其詞子書紳字孟彬持躬樸實授徒教以誠敬為宗詩附梓留爪集道光年占籍秀水八邑庠新纂

馬承惠字麟洲江南吳縣籍寓聞川父病刲股得延父壽十年咸豐八年題旌徵信錄



嘉興府志卷五十三

嘉興府志卷五十四

嘉興府知府善化許瑤光重輯

列傳

嘉善縣

明

孫詢字廷言博學多才宣德初應賢良詔為廣西布政司

檢校時峒蠻竊發無甯歲安遠侯柳溥擬詢往諭之詢

毅然冒險入宣上威德事以定陞分宜縣丞歲禳平量

命衡去冗費設法賑濟全活甚眾尋以疾致仕所著有忠

孝廉節武塘覽勝諸書孫璧字拱樞官景州訓導亦善

詩文

嘉善倪志
參于志

俞綱字宗正寓籍上元為諸生改隸順天舉修宣廟實錄
 歷中書郎王受封簡輔導詔綱侍講歷陞太子少保兼
 兵部侍郎改南京禮部成化二年致仕十四年卒賜祭
 葬綱和厚縝密謹身率職稱為長厚君子王世貞言綱
 入內閣不由翰林且係乙科亦本朝異數然考綱當日
 被命即辭實未嘗入閣也

嘉禾徵
獻錄

施奇字廷偉少好學寒暑不輟登景泰甲戌進士授工部
 主事奉使山後諸鎮閱視兵砦邊將餽遺悉卻之尋復
 清匠江西至建德鄉人有官縣幕者以白金餽奇駭曰

是安得此若執汝是賣廉矣亟去鄉人慙而退擢知太

平府改知萊州卒

分省人
物考

劉侃字克剛景泰初領鄉薦選知涇州政尚寬簡朔方歲
 事征討涇當要衝大將提兵必道涇侃措置有方雖供
 億百出民不擾都御史馬文升嘉其績與御史劉廷高
 交章論薦擢守延平同知某恃才凌轢侃置弗較未幾
 沒撫恤其家時稱長者侃素廉約兩赴官皆鬻產以行
 及歸囊篋蕭然授徒自給足不入城市號樂閑翁工楷
 書詩文亦清麗卒年七十

楊霖字時望祖嗣宗洪武中以人才徵試工部主事霖自

少以氣節自負聞四明楊守陳遂易學負笈從之遊天

順中貢領應天鄉薦知玉田改任寶坻抑強扶弱清白

自守有古循吏風以上嘉禾
徵獻錄

夏勛字汝建知內邱縣歲飢蠲民租仍出粟賑之全活甚

眾勛為人疎簡持大體不屑屑細故逮居官持法不撓

除奸去盜境內肅然

高第字士元以貢授永福知縣先是縣被兵荒民多流亡

第至廣招撫給田開墾民復故業

周紀字廷理以進士授豐城令縣多淫祀有曰官將軍者

尤惑人紀下車立毀之人服其正以上袁志參嘉
善倪志于志

任泰字亨伯成化乙未進士授上饒令時婁諒稱名儒屈

體事之為政知大體增置學舍親為講授立法清丈田

畝以杜爭訟作浮梁增社倉凡有利于民者行之不遺

餘力孫繁字公職為新野王府教授王年少繁以輔導

自任進講輒以前代賢王事條析陳之繁事母孝父遺

產悉讓諸弟弟芹為蕪湖訓導醕厚簡默不苟言笑里

人稱任氏世德云嘉禾徵
獻錄

王琳字廷佩登進士為兵科給事中彈劾不避權豪尋陞

福建右參議招撫永安頑民八百戶清廢稅千餘石轉

貴州參政卒嘉善
倪志

王相字廷輔以貢拜蘄水丞邑田無經界多為巨室兼并

相至首正之濬畝澮以興水利御史上其事特加旌異

尋移疾歸

嘉善志

於珥字文瑞以進士知南皮縣遷吳橋丁外艱服闋改知

無極皆有能聲擢建甯府同知革清軍紙價黜貪令衛

有屯田久侵于民軍多逃亡凡五奏不得白珥按籍悉

還之軍乃歸伍正德初擢知慶遠府土酋缺貢賦例出

金啗守珥以其物充逋夷大感悅郡人不知學立程式

以課文教大興

嘉禾徵獻錄

卞謙字信之父嗣家貧客同里有女窺之辭去為諸生不

仕謙宏治壬戌進士授廣信府推官決獄精允雖老吏

不逮嘗經鉛山嶺道有臥屍忽夜夢一人曰我傭者為

主所殺密訪其人得之竟抵罪郡有巨室殺人匿屍燕

室中謙廉其處發屍驗之遂伏辜其發奸摘伏類如此

嘗謂姑息所以養盜乃嚴鉤捕得宿盜重治之盜乃止

三載行取道卒兄子玉有至性母病籲天願代為廣東

海陽教諭子錫負異才篤學登嘉靖丙辰進士官司勳

時嚴嵩柄政不為屈又嘗卻蘇賂賂時論重之

嘉禾徵獻錄參

嘉善志

王俸字廉父嘉靖壬戌進士授職方從尚書劉燾征曾一

本燾欲誅老帥王詔俸力為解釋後竟用詔擒酋首以
 獻歷武選郎以議馬市忤高拱張居正而拱又秉銓遂
 出為永州守庭無滯獄乞終養歸服除拱居正先後敗
 起廬州知府累陞湖廣道御史以疾乞休居家好施予
 宗黨賴之

沈科字子進嘉靖甲辰進士授工部營繕司主事庚戌邊
 烽直薄都下軍務久弛猝不能辦車牛科旦夕支給數
 日而畢飛輓旁午賴以濟知臨江府遷江贛兵備副使
 平劇賊李文標等時官江右者皆嚴嵩私人聞科才陰
 令人諷之科正色曰科即不才柰何以天子臣為相公
 奴隸嵩銜之未幾轉苑馬寺卿左遷河南副使有欲為
 科謀解於嵩者科聞而謝之卒不聽甫之官嵩喉言官
 劾罷之科事親孝撫其弟友愛生平磊落多大節嗜學

能文著有史抄二十卷以上嘉禾徵獻錄

盛唐字元陶嘉靖戊戌進士初授江西吉安府推官每讞
 獄摘發幽隱爰書成已手吏胥不能為奸入為湖廣道
 御史時重建太廟有希上意者奏當倣周制七廟以憲
 宗為祖興獻帝為考唐極言其非疏入世宗震怒覽其
 疏擲地者三浹旬後得旨罰俸邪議遂寢巡按陝西以
 劾仇鸞降湖廣布政司照磨陞國子監博士累陞湖廣

副使分省人物考參
嘉禾徵獻錄

錢貞字子元博學積行嘉靖丁酉順天鄉薦授福建尤溪令操守峻潔愛民好士陞汝甯府同知悉心佐政保民如赤子代去百姓攀援不忍舍夾轂焚香追送數十里而後返以入覲卒于京師汝人聞之爲之巷哭著有實政錄其在信陽捐俸薪以完逋賦西平則均馬政以省夫役確山則修庠校祀呂先生于鄉賢皆政之卓卓者嘗修尤溪志詳于土田戶口賦役尤久德之立碑祀名宦

兩浙名賢錄
參嘉善楊志

陸邛字秀卿嘉靖丙戌進士初任南刑部嚴嵩方爲翰林

求訂交拒不納嚴令人私詢其意邛曰此人雖有時名實奸雄也嵩銜之歷任兵部武庫出知武昌徙岳州在任崇節儉寬逋息訟措牛種開荒蕪歲飢竭倉以賑活飢民數百萬時嵩已柄政銜前事十年不調御史伊毓生巡歷至岳邛供奉甚薄伊怒直入其署惟老蒼頭二人做筐無鎖檢之殘書百帙布衣數事而已特疏薦陞京堂邛至都不謁嵩嵩遣人諷之邛曰受職天朝拜恩私第賢者不爲況未受官而先謁權貴乎卒不往陞太僕少卿轉光祿正卿以僉都御史撫河南乞歸

錢于鄰字德卿嘉靖丙辰進士授邵武知縣歷官四川按

察司僉事性儉樸絕無宦情孤立行意而已以上嘉禾徵獻錄

丁賓字禮原隆慶五年進士授句容知縣徵授御史大學

士張居正賓座主也誣劉臺以賊屬賓往遼東按之賓

力辭忤居正意去官萬曆十九年用薦起故官累遷南

京右僉都御史兼督操江江防多懈賓率將校乘一舟

往來周視增守兵戍要害部內晏然南衛世職率赴京

師請襲留滯不得官賓請就南勘襲妖民劉天緒左道

事覺兵部尚書孫鑛欲窮治之詔下法司訊鞠賓兼攝

刑部大理事力平反論七人死餘皆獲釋召拜工部侍

郎尋擢南京工部尚書自上元至丹陽道路盡易以石

行旅頌之數引年乞罷光宗立始予致仕賓官南都三

十年每遇旱潦輒請賑貸時出家財佐之初以御史家

居及丁憂歸連三年大飢咸捐資以賑至天啟五年復

捐粟三千石賑貧民以資三千金代下戶之不能輸賦

者撫按錄上其先後事時已加太子少保詔進太子太

保旌其門以年高三被存問卒年九十一諡清惠明史

朱鳳字文瑞貢生為邵武教授郡有淫祠賽祭無虛日鳳

往以杖擊之像自塌壞二子賢愚賢字汝賢以貢官汚

陽學正戶部蕭某從賢受經讞獄至浙有大姓坐法論

死用賄乞求未減賢卻之愚字汝明負氣節會上書規

郭縣令郭謝過表其書于門以示悔任松江府訓導

嘉禾

徵獻錄

孫朝宗字賓江至孝事父百歲翁嵐及母鍾依依孺慕寢

食未嘗不在側伯兄朝宰病瘵早世哭之慟啟其衾同

臥曰今而後不復與兄同此被也隆慶丁卯鄉薦授福

建順昌令歲大祲捐俸易家產佐賑全活數萬邑設關

舊有私稅請除之沒祀名宦錢士升為立傳

嘉善楊志

錢吾德字湛如食貧力學萬歷初禾郡推三名家一為袁

了凡一為馮具區一即吾德時人咸以公輔期之庚午

舉干鄉秉鐸苕上擢遷安令多惠政邑為闢藪槩不與

通補泰甯令益砥清白有置黃金于茗器以饋者密封

還之民苦逋賦為核產分戶均役平輸邑產斷腸草民

有憤鬪輒輕生食之吾德令犯法者拾草多寡以贖罪

重輕期年根莖盡絕移守甯州大水矯檄發賑居官不

潤脂膏居家不問生產凡焚券裂責助婚助葬皆歡喜

為之子繼登有傳次子繼振鄉貢不仕以孝友聞繼章

崇禎丙午舉人

嘉禾徵獻錄

毛汝賢字見吾嘉靖丙辰進士授鳳陽府推官累陞郎中

降南禮部員外遷大名兵備副使汝賢性坦夷不留宿

忿其調禮部以御史周宏祖劾之故論降及在大名宏

祖適為屬吏于公事無纖介嫌宏祖亦詳其行事大愧

服焉

嘉禾徵獻錄

朱廷益字汝虞萬厯丁丑進士為漳浦令歲比不登捐俸

賑飢全活甚眾補令嘉定時苦漕兌請于大司農改折

二十萬石歲省民財以五萬計奏最得南儀部遷考功

擢僉事督江西學政屏絕干謁益王餽古琴受而檄諸

學宮曰此琴貯文廟以彰賢王崇儒雅意翌日王以妃

弟囑廷益謝曰校閱時何由私識執法所以敬王也發

卷置劣等擢南通政司參議

馮夢禎行略

支大綸字心易萬厯甲戌進士試政西曹時江陵秉政進

白燕紅蓮以為瑞綸言於朝曰大臣不宜稱祥瑞啟侈

心遷泉州司理時侍郎洪朝選失江陵意欲中以法乃

為書具陳天道人事不宜枉殺大臣以媚人江陵益噤

之遂罷官又七年推補江西藩幕遷奉新令復與上官

不協掉首而還卒門人私諡文介先生著有嘉隆編年

史華平集行于世子如玉有傳

橋李詩繫

王慎德字允明萬厯庚辰進士知萬安縣力鋤豪強有能

聲行取廣東道御史出按廣東復按四川與討平楊應

龍之亂上功將遷值竝封事起疏請建儲甚力忤旨罷

光廟立追贈光祿寺少卿

葉繼美字含章萬厯癸未進士知金溪縣清寃滯丁憂補蕪湖擢刑科給事中彈劾不避當路請建儲停礦稅及疏救王錫爵高攀龍甚力出典湖廣鄉試累進吏科都給事中以疏阻東事削籍後東事敗一如繼美言終不得申理子培恕字行可崇禎甲戌進士知崑山縣考察降福建按察司照磨不赴歸

以上嘉禾徵獻錄

袁黃初名表字坤儀仁子黃少負異才于三乘四部星雜諸書無不研究萬厯丁丑會試擬第一以策忤主試被落後改名黃至丙戌始第授寶坻知縣邑諸役倍于田賦車運皇木爲甚黃請由會通河運入移皇木廠於三

賢祠北使濱水受木便臺使爲奏報可因盡革重夫重馬採石及箭手諸役邑田窪下比歲大潦黃浚治三仝河築隄捍之海水時溢入爲患令海岸多植柳高數尺潮退沙遇柳卽淤漸成隄因于隄內地開溝墜課耕種曠土大闢遷兵部職方司主事適倭侵朝鮮朝廷大舉東征經略薊遼宋應昌請黃贊畫與劉黃裳浮海渡鴨綠江調護諸師提督李如松桀驁自恣黃數其罪大恨與黃裳比而構之未發如松大敗于碧蹄館兵部尙書石星意主款黃亦以將驕兵罷上書于星未幾而如松以十罪列黃黃遂以京察免歸熹宗立吏部尙書趙南

星追敘東征功贈尚寶司少卿子儼字若思天啟乙丑

進士授高要知縣悉心籌畫興革甚多雨潦驟漲城中

水深三尺儼走暑雨中竭力拯援治苦蓋作粥糜倚工

撈溺斂瘞浮骸入秋淫霖不止米價騰踊細查貧戶而

親給之以勞瘁嘔血猶親民事遂不起士民市喧巷哭

如喪所生 吳江志參嘉禾徵獻錄

錢承統字道光少孤事兄以禮從杜偉講學松陵獲聞羅

念庵主靜之旨製一木榻晝夜危坐其中刻苦提撕後

漸進平實 嘉善章志

丁寅字直原幼敏嗜學入北雍無所遇遂屏舉子業遊王

畿唐樞之門講身心實學事母盡孝做衣蔬食人稱爲

篤行云 袁志

曹津字元會諸生以貢歷南安府教授課士有程調貧生

卻贈賄秋毫無所苟著周禮集傳 嘉善楊志

陳于王字用賓萬歷丙戌進士授魏縣父憂服闋補句容

甫下車申飭保甲法奸宄屏息凡徵收節縮必殫思斟

酌據道理遠近立爲限嚴胥吏出入防其侵擾聽訟多

以理論令兩造自釋遷刑部主事士民擁道遮留若失

慈父母于王以祖母年九十告改南兵部督龍江關稅

中官在南者亦設科稅于儀真撓于王權于王曰該監

嘉善列傳

不得侵本部職重困商民有假中旨橫索者以法從事
 遂止不復稅調吏部陞湖廣按察司副使兵備武昌值
 淫雨漢水暴溢穀騰貴羣盜並起山谷深僻有數大姓
 實為盜首于王練兵按甲弗動檄諭何陳徐譚等十二
 姓反覆開導于是縛其渠魁以獻盜悉平尋陞四川按
 察使未蒞事歸逾年改推福建命下以疾卒子山毓龍
 正有傳

沈道原號淮槎科子萬厯乙未進士授樂安令以病歸樂
 安士民挽留甚切改松江教授陞國學尋轉工部主事
 歷改吏部道原在松江知青浦知縣某貪墨無狀及司

察遂斥之青浦民咸以為快調文選司以病告歸道原
 業可自給入官後中落人稱其清操

以上嘉禾徵獻錄

馮盛典字桂海萬厯辛丑進士授刑曹出守歸德遷兩淮
 運使與巡鹽爭禮至上聞詔令抗禮累遷河南布政使
 謝政歸莊則孝字翼庵戊戌會試辛丑廷試授福建興
 化推官平反無疑獄陞禮部主客郎乞歸行李蕭然沒
 祀鄉賢沈萬鈞字玉臺鄉薦後力學著書有詩經類考

傳世

嘉善楊志

曹穗字泰字家貧事父極孝養撫幼弟以恩婚喪之儀必
 式於古祭必齋器物必夙戒覃思性理河洛之言期月

間鬚髮為白執經者甚眾魏忠節大中出其門生平無疾行無惰容無譁語無違心之言無欺人之事子勳有

傳 嘉善章志

夏九鼎字台卿少從顧憲成學萬厯間鄉薦北上憲成屬其請益於李材時材官兵部侍郎誣下獄九鼎從獄中受講登進士即抗疏白其冤釋褐疏爭三王並封事艱歸補新喻令調安福皆清操自勵多政績上計卒於道貧不能殮生平秉禮蹈義晝所為夕必書之任安福時莫敢干以私人稱為夏鐵耳 袁志參西江志

錢天允字延之萬厯辛丑進士知攸縣勤慎樸素革除羨

餘贖鍰豪猾望風束手毀諸淫祠尤詳慎刑獄民無冤濫入為工部都水司主事進兵部郎中卒祀鄉賢 嘉禾徵獻錄

毛尚忠字誠庵萬厯甲辰進士厯海澄棗強令皆有治績

陞工部主事杜絕中貴人請託光宗在東宮異之書承

恩堂額以賜遷雲南僉事弟尚質尚文尚質字素庵狷

介重然諾尚忠卒子幼尚質撫育遺孤辛勤備至尚文

字郁庵以鄉貢為新昌訓導 一作餘姚巡按以其才檄令查

盤一郡庫藏積弊釐剔殆盡遷紹興府教授 嘉禾徵獻錄參吳志

計元勳號明葵萬厯丁未進士由南銓部郎出為山東參

政分巡濟南東省謀建逆璫生祠遂挂冠歸爲人敦慤有古風宦轍所至咸著清節居家杜跡城市鄉黨推爲

祭酒

嘉禾徵獻錄

蔣英號吧瞻萬厯庚戌進士初令松溪調漳浦服闋補宜興爲江南劇邑賦煩民困英愛民執法薪米之需咸取給於家厯遷南刑禮二部主事旋改南驗封司郎中轉福建副使未之官時璫逆勢焰已極英與周宗建爲姻家因于推升疏內批蔣英依傍門戶著革職忠賢敗以故官分巡蘇松坐事貶秩未行而宜興民變上官以英先治宜興得民心檄之撫治單騎往諭法豪家僮客數

人令亂民自獻其首惡亂遂定宜興故多豪家修撰陳于泰編修陳于鼎兄弟尤橫遂激民變執兵鼓譟勢洶洶賴英事旋定而周延儒方枋國與陳氏有連銜英再

貶兩秩遂歸

嘉禾徵獻錄參明史

錢士升字抑之萬厯四十四年殿試第一授修撰天啟初以養母乞歸進左中允不赴高邑趙南星同里魏大中受璫禍及萬燦杖死追贓皆力爲營護破產助之起少詹事掌南京翰林院卽謝病歸後起南京禮部右侍郎署尙書事祭告鳳陽陵寢疏陳戶口流亡之狀甚悉拜禮部尙書兼東閣大學士入朝請停事例罷鼓鑄嚴贓

吏之誅止遣官督催新舊餉第責成於撫按帝悉從之
帝操切溫體仁以刻薄佐之士升因撰四箴以獻大指
謂寬以御衆簡以臨下虛以宅心平以出政其言深中
時病帝雖優旨報聞意殊不懌也無何武生李璉請括
江南富戶報名輸官行首實籍沒之法士升擬旨下刑
部提問帝不許體仁遂改輕擬士升曰此亂本也當以
去就爭之乃疏言自陳啟新言事擢置省闈比來借端
倖進者實繁有徒然未有誕肆如璉者也郡邑有富家
固貧民衣食之源也地方水旱有司令出錢粟均糶濟
飢一遇寇警令助城堡守禦富家未嘗無益於國周禮

荒政十二保富居一今以兵荒歸罪於富家朕削議括
其財而籍沒之此秦皇不行於巴清漢武不行於卜式
者而欲行於聖明之世乎今秦晉楚豫已無甯宇獨江
南數郡稍安此議一倡無賴亡命相率而與富家爲難
不驅天下之民胥爲流寇不止或疑此輩乃流寇心腹
倡橫議以搖人心豈直借端倖進已哉疏入而璉已下
法司提問帝報曰卽欲沽名前疏已足致之毋庸汲汲
前疏謂四箴也士升惶懼引罪乞休帝卽許之弟士晉
由進士除刑部主事崇禎時以山東右布政擢雲南巡
撫築師宗新化六城濬金針白沙等河平土官岑儂兩

姓之亂頗著勞績已而經歷吳鯤化訐其營賄體仁卽擬嚴旨欲因弟以逐其兄命下而士晉已卒事乃已明史

錢棫字去非原名格士升子少從婦翁吳兵部志遠講求

性命之旨崇禎庚午漳浦黃道周典浙試得其牘謂必

老師宿儒置第八及謁見年僅弱冠黃益嘆賞爲人厚

重寡言不妄交與鄉舉後益刻勵學問道周以言事下

獄棫納橐餽不避險難後講學杭之大滌山棫病起褰

裳往從竟中風露卒年三十三道周呼其名而慟之曰

吾道無傳矣姜採撰墓志

錢棟字仲馭士升仲子崇禎丁丑進士授南職方轉郎中

察軍政剔夙弊中涓欲有所撓糾之不少枉南都稱健

決郎遷廣東僉事請終養棟伉爽豪邁其天性而言呐

呐如不出口至於處大事決大疑臨大節雖古剛介大

臣不是過甲申都城陷棟方病嘔血聞北耗糾兵勤王

慷慨誓師聞者感激泣下一切糧餉皆破產爲之乙酉

八月殉節震澤生平博綜正史兼採漢魏六朝諸名家

皆有成編尤好爲詩夏夏去陳論者方之李長吉所著

有少司馬新艸儒園文部余懷撰傳參

錢梅字彥林士晉子崇禎癸酉舉人兵部職方司郎中國

破死梅子默字不識崇禎癸未進士知嘉定縣鼎革後

不知所終或言其爲僧名成回卒於越之顯聖寺有吹

簫草嘉禾徵獻錄

錢繼登字龍門萬曆丙辰進士授刑部主事有珠商與大

璫乾沒帑金鞫訊不少貸轉郎中摘猾胥奸弊守饒州

修復芝山書院與諸生講學陞蘇松副使謫歸崇禎末

起江防都御史未赴淮揚失守歸卒年八十餘著壑專

堂集東臬問耕錄易窺南華拈笑孫武子繹等書弟繼

振繼章有傳吳志參嘉禾徵獻錄

周宗文號開鴻萬曆丙辰進士令清江築隄以捍章貢諸

水邑多盜廉得爲首者捕斬之黨悉散行取貴州道御

史時廣甯失守疏糾兵部尙書張鶴鳴緩師玩寇請明

正國典以儆後人京師大雨雹疏請扶陽抑陰時宦寺

專寵惓惓以君子小人消長爲言不報值三案會議宗

文持論侃侃大璫銜之幾及禍以艱歸起尙寶卿請卹

死節諸臣糾李承祚等附璫之罪引疾歸再起光祿推

京尹爲柄國者所抑解綬歸弟丕顯字知徵天啟辛酉

舉人時若有朗悟甲申三月忽呼同年曹勳陳龍正及

兄宗文謂之曰國家有大故期且不遠余死不及見諸

君好爲之有頃捉鼻而逝後十餘日國破如其言嘉禾徵獻錄

魏大中字孔時自爲諸生讀書砥行從高攀龍受業家酷貧意豁如也舉於鄉家人易新衣冠怒而毀之萬曆四十四年進士官行人天啟元年擢工科給事中楊鎬李如楨既論大辟以僉都御史王德完言大學士韓爌遽擬旨減死大中憤抗疏力爭詆德完語并侵爌帝爲詰責大中御史周宗建徐揚先張捷徐景濂溫臬謨給事中朱欽相右德完交章論大中久而後定明年偕同官周朝瑞等兩疏劾大學士沈淮語侵魏進忠客氏及議紅丸事力請誅方從哲崔文昇李可灼且追論鄭國泰傾害東宮罪持議峻切大爲邪黨所仄目太常少卿王

紹徽素與東林爲難營求巡撫大中惡其人特疏請斥紹徽紹徽卒自引去再遷禮科給事中是時恤典冒濫每大臣卒其子弟夤緣要路以請無不如志大中一切裁以典制遷吏科都給事中大中居官不以家自隨二蒼頭給爨而已入朝則鍵其戶寂無一人有外吏以苞苴至舉發之自是無敢及大中門者吏部尙書趙南星知其賢事多咨訪朝士不能得南星意率怨大中而是時觚排東林者多屏廢方恨南星輩次骨給事中章允儒江西人也性尤忤喉其同官傅繼假汪文言發難文言者歛人初爲縣吏智巧任術負俠氣入京輸貲爲監

生用計破齊楚浙三黨察東宮伴讀王安賢而知書傾心結納與談當世流品光燾之際外廷倚劉一燦而安居中以次行諸善政文言交關力爲多魏忠賢既殺安府丞邵輔忠遂劾文言褫其監生復逮下吏得末減益游公卿間大學士葉向高用爲內閣中書大中及韓爌趙南星楊漣左光斗與往來頗有迹會給事中阮大鍼與光斗大中有隙遂與允儒定計囑檇劾文言并劾大中與光斗等交通文言肆爲奸利疏入下文言詔獄大中時方遷吏科上疏力辨詔許履任御史袁化中給事中甄淑等相繼爲大中光斗辨大學士葉向高以舉用

文言亦引罪求罷獄方急御史黃尊素語鎮撫劉僑曰文言無足惜不可使搢紳禍由此起僑頷之獄辭無所連文言廷杖褫職牽及者獲免大中乃遵旨履任視事楊漣疏劾忠賢大中亦率同官上言忠賢得疏大怒矯旨切讓尙未有以罪也大學士魏廣微結納忠賢表裏爲奸大中每欲糾之會孟冬時享廣微偃蹇後至大中遂抗疏劾之廣微慍益與忠賢合吏部推謝應祥巡撫山西廣微遂嗾所親陳九疇劾大中出應祥門推舉不公貶三秩出之外盡逐諸正人吏部尙書趙南星等明年逆黨梁夢環復劾文言再下詔獄鎮撫許顯純自削

續以上南星漣光斗大中及袁化之繆昌期周朝瑞顧
大章李三才輩無所不牽引而以漣光斗大中化中朝
瑞大章爲受楊鎬熊廷弼賄矯旨俱逮下詔獄鄉人聞
大中逮去號泣送者數千人比入鎮撫司顯純酷刑拷
訊血肉狼籍其年七月獄卒受指與漣光斗同夕斃之
莊烈帝嗣位贈大中太常卿諡忠節錄其一子明史
魏廷相字翊卿大中從弟萬曆甲辰進士授汝陽令始至
卽開河以便漕輓居官清約人不敢干以私嚴持吏胥
令不得翫法邑中春耕無桔槔取水爲艱廷相乃令倣
吳農作車戽水于是濱河之地皆可種稻墾荒數萬畝

民號魏公車服闋補棗強行取四川道御史未受事卒

嘉禾徵
獻錄

曹烈字允和更字鴻甫幼不好嬉動作有度通曉圖書天
文地理已謂無益身心性命遂矢志濂洛之學卒年二
十八語弟子魏學泚曰吾肢體日就銷脫而靈覺不減
於舊卒之日從容言別神色不亂著蒙養錄果行編新纂
魏學泚字子敬少隨父大中讀書破寺中刻苦勵志大中
以璫禍被逮學泚號呼泣血欲隨侍入都大中厲聲曰
若智出孔文舉八歲兒下耶奈何以完卵狗覆巢學泚
易姓名密隨檻車行不令父知入都潛匿邸舍暮夜叩

當途父執無能發公憤者欲上書代父不得痛不欲生
 大中既斃獄中遑遽扶櫬歸里見母痛絕仆地跡不入
 中閫日夜伏草啼號家人間進粥糜輒揮去曰詔獄中
 安得有此淚盡繼之以血遂死死二年弟學濂伏闕訟
 大中寃并白學泚死孝狀又瀝血上疏劾阮大鍼傅樾
 交通逆奄實殺諸臣制詔褒美曰以爾臣忠彰為子孝
 泚濂之義生死同揆學泚許配父祠癸未學濂成進士
 入翰林時賊陷太原濂請東宮或二王往鎮南服又言
 當糾合畿輔義士為勤王師城陷作絕命詞自縊死濂
 豁達多大略痛父詔獄之慘終身布衣無重味母病割

臂肉和藥進乃瘳

樞李往哲編

李奇珍字四可萬歷進士知長樂縣定役緩徵興利剔弊
 任九載召入兵戶二科有爭國本止開礦議營田陳星
 變諸疏陞太常寺卿家居十五年無一字入長安卒祀
 鄉賢長樂有雙清特祠袁志
 李奇玉字元美幼擅文名與兄奇珍有二李之稱萬歷癸
 卯舉於鄉研思易學時高攀龍講道東林奇玉北面就
 正忠憲勛之曰發吾蘊者子也天啟壬戌魁南宮歷遷
 兵工兩曹再守汝甯數月引疾歸發篋中所箋註研晰
 疑義不停筆者十年雪園易義成大旨與師說相發明

甲申聞變悲憤卒學者稱荆陽先生子松崇禎庚辰進

士官歙縣令

儒林傳參
嘉善楊志

吳志遠號遠庵舉孝廉三十年未嘗謁官府就教烏程擢

翰林孔曰改禮部司粉時尚書孫慎行爭紅丸事託志

遠詮次章奏屬意用之志遠力請就閒轉南兵部郎璫

禍發嘆曰吾不能如皇甫規自附黨人尙思懷綬乎卽

告歸年八十終子亮中順治壬辰進士戶部員外郎

袁志

參嘉善
楊志

卞洪載字子厚從高攀龍遊獲聞性命之旨崇禎間兩舉

徵辟不就晚舉鄉飲賓亦不赴著有辨邪說持敬省察

約言綠雪軒詩行世

嘉禾徵
獻錄

郁調元字涵真性孝鄰失火從烈焰中負母出踰垣涉河

兩踝皆裂父母歿廬于墓側饗祀必哭終其身如一日

以廩例入國學謁選得儀封承司河務秋水衝溢濬築

盡瘁河賴以平遷遼陽參軍單車赴遼區畫邊備嚴汛

守募勇敢儲糗糧廣芻牧放古金城方略召丁壯給牛

種耕具于山之右墾田萬畝鄉人有戍遼失所者厚給

之致政歸以子之章贈如其官

袁志

顧際明字良甫曾祖謹有義行父態見孝義際明萬厯已

丑進士選庶吉士爲雲南道御史請告養母丁憂起河

南道上言播酋應龍必叛宜早為之備未幾應龍叛隨奉命按廣西事竣歸上方以言官交爭國本遷怒臺省遣斥三十餘人際明與焉天啟踐阼求言陞太僕寺少卿先是際明在臺巡視太僕洞悉馬政之弊至是益甚乃刻意節省減費不貲以黨禍將起引疾歸

嘉禾徵獻錄

陳龍正字惕龍父于王福建按察使龍正遊高攀龍門崇禎七年成進士授中書舍人時政尚綜覈中外爭為深文以避罪東廠緝事尤冤濫十一年五月熒惑守心下詔修省有哀懇上帝語龍正讀之泣上養和好生二疏略曰回天在好生無過減死梟陶贊舜曰罪疑惟輕是

聖人於折獄不能無失也蓋獄情至隱人命至重故不貴專信而取兼疑不務必得而甘或失臣居家所見聞四方罪犯無甚窮凶奇謀者及來京師此等乃無虛月且罪案一成立就誅磔亦宜有所懲戒何犯者若此纍纍臣願陛下懷帝舜之疑甯使聖主有過仁之舉臣下獲不經之愆蓋陰指東廠事也其冬京師戒嚴詔舉堪任督撫者御史葉紹鵬舉龍正久之刑部主事趙奕昌請訪求天下真賢才帝令奕昌自舉亦以龍正對帝皆不用龍正居冷曹好言事十二年十月彗星見是歲冬至大雷電雨雹十三年二月京師大風天黃日晡淡旬

不解龍正皆應詔條奏大指在聽言省刑時議欲用龍
 正為吏部御史黃澍以偽學誅之十七年正月左遷南
 京國子監丞甫抵家而京師陷福王立於南京用為祠
 祭員外郎不就南京不守龍正已得疾遂卒明史
 孫朝二號賓瀾諸生入成均為廣東藩司首領官有兄弟
 構訟經年不息者朝二取具詞裂之諭以一體至愛二
 人恚悔各謝過獄地卑溼瘠死狼藉別營高敞徙居之
 遇大水立括贖緩佐以薪俸扁舟風浪中且拯且賑他
 若平治道塗庀葺鬻序立義倉以備荒禱皆長治久遠
 之計晉階奉直大夫三舉鄉飲賓粵中祀名宦邑祀鄉

賢禾郡雜記

陸敷錫字德承光祿丞遷柳州通判署象州事安仁土司
 何公思等聲言花蘆古陳諸賊倡亂請為朝廷除之其
 實欲藉此剽掠為奸邊地居民騷然聚眾數萬與土司
 相攻殺上官遣吏往慰諭之不解賊曰即欲撫我須陸
 通判來敷錫單騎往撫遂帖然散去尋署賓州事時斷
 藤峽雖平然道險民少間為山賊竊踞敷錫乃相要害
 移置衛所一十九處由是山賊遠遁以母老乞歸浙江通志
 柯元芳字月傳崇禎進士授建甯府推官署甌甯浦城接
 壤甌甯江山麻錠賊盤互剽掠元芳募壯勇設關謀擒

賊首五大王餘黨竄伏元芳還郡而監司僨師以遺寇
 許元芳坐鐫級已而賊嘯柘浦約日取浦城元芳訶知
 之午夜勒郡邑兵分道掩捕質明七十餘酋反手就縛
 諸大吏驚相告曰是果能辦賊非縮朒縱賊者當元芳
 鐫級時屬邑令夏允彝與直指抗辨而閩人亦相率訟
 言之卒用得直解官歸居十五年而卒元芳天性至孝
 初釋褐得父平安信忽心動急馳歸而父病劇侍母終
 身如孺子歡居鄉多行陰德著述自娛子聳有傳

參嘉善
楊志

浙江
通志

曹勳字允大崇禎戊辰會元授庶吉士官至禮部侍郎時

門戶角立勳負時望在講筵每隱護正類魏大中被逮

周旋患難吏垣章正宸言事下獄請救得釋乞養十年

留都召起見時事日非規切相臣尋以母喪歸勳精於

易著易說三卷祀鄉賢

樵李詩繫參
嘉善楊志

沈鴻起歲貢就教累轉太湖教諭左良玉以師東下人勸

其去鴻起毅然曰吾本鐸明倫而苟免君父之難乎卒

死于寇闖門一十三人俱遇害

明史

徐遠字道招少孤力學崇禎癸未進士任中書國變堅臥

不出長吏至門輒辭以疾葛巾野服三十八年不改

吳志

參嘉善
戈志

陳揆字子眾平居節儉自謹好周人急遇歲旱設法救荒

少善病絕意進取專心學古于經史多發明晚歲研悅

性理所著有省心日記十卷弟修字子近專攻三禮貫

穿六經有經緯書分九部藏于家 袁志參嘉善楊志

沈崗字若英本姓蔡性沉毅端謹究心濂閩受業百餘人

一時稱為安定弟子兄弟五人友愛無間言皆諸生 嘉善

楊志

丁鑛字九貢賓子恩蔭當得官不就中辛酉副榜研究宋

元諸儒宗旨身體力行化畛域忘喜愠與人語嘔煦惟

恐傷之然外和中嚴不苟同雖燕處必整飭盛暑未嘗

脫帽露頂邑令以望重造請見率婉辭以謝不問戶外

者四十餘年日手一編凡論人物臧否政事得失皆窮

極源委若鬻產償族孫逋賦歲饑發粟賑濟其為善多

類此卒年八十七 嘉善志

沈龍翼崇禎十七年以府試第一入庠年已五十順治二

年王師臨境是日戴儒冠登東亭橋赴水死時有訓導

錢一選陳鶴鳴在城亦死於兵 嘉善志外紀

國朝

錢楞字芃生士晉子順治三年隨征入閩署將樂令會山

寇吳長文等竊發建甯失守將樂被圍城中無兵楞與

丞方抗督鄉勇登陴拒之堅守九月城碎率家丁夏允

中沈貴等巷戰手刃二賊馬蹶被殺家丁死者數人雍

正五年榜孫禮部侍郎以壇陳奏 贈按察司僉事祀

功臣廟

福建名宦冊

柯聳字素培己丑進士授棗陽令邑當楚豫關陝之衝流

寇穴西山數出為患聳厲眾登陴寇旋散舊帥孟應學

歸誠返蜀道由襄有利其資者誣為奸宄下獄死聳廉

其枉盡釋其家以卓異授禮科前後歷五垣凡十九年

奏疏凡五十七上如請卹楚省凋敝蠲吳江歲租及建

言春秋宜四傳竝重不得專主胡傳又請以理學名臣

方孝孺從祀皆卓卓可傳轉通政使參議乞養歸著有

存古堂文藁霽園詩集子崇樸維禎有傳鄧枚陝西甯

夏兵備道

嘉善崔志

郁之章字衷恒順治己丑進士歷官分巡道駐上杭時海

寇入漳聲言來攻人情驚恐之章以靜持之密約城守

張國棟整飭營伍趣士民集演武廳手草檄以忠義激

發士民咸願効死賊知有備而退陞大理寺丞以譴歸

杜門課孫獎掖後進執經問者甚眾纂修邑乘若干卷

福建名宦冊參嘉善戈志

沈鱣字木門順治辛丑進士知建安縣事兵燹後土田荒

蕪蠹胥巧為影射縛廉得實窮治不少貸先是藩廝以

錢貸窮民勒息數私禁榜掠有鬻妻孥以償者官莫能

制縛曰愛一官而脅於輿隸使民無告吾恥焉捕置之

法民大悅浙江通志

張茁字文蔚順治壬辰進士家貧四世不異爨兄芷早亡

撫其子如己子歷部郎出為安慶守開荒田二千餘頃

其請蠲請賑諸書民頌之有流涕者以註誤歸袁志

吳亮中字寅仲與錢繼振郁之章魏學濂學洙學渠曹爾

堪蔣玉立稱柳洲八子構來問堂鍵戶力學順治己丑登

進士授戶部主事督理漢中糧儲有頌聲轉員外郎橋

詩繫

孫籀字潔初順治己丑進士任山西學道稱得人大學士

陳廷敬吳璵侍郎田逢吉皆其所拔士尋補福建糧道

值廈門用兵先時籌餉刻期奏捷移鎮靈武開屯治河

在安廬撫凋瘵鋤豪猾修學校善政畢舉轉南汝因辦

公馳驅墮馬傷足告歸每去任士民鐫碑建祠卒祀鄉

賢子復煒由縣尹陞主政復煇有傳嘉善志

沈鼎字止岳順治己丑進士隨征入粵授肇高道適蒼梧

陷獨守孤城二載又平洞荷諸寨山賊陞福建海道築

隄防通水利廢墜悉舉轉徽甯道吳志

嘉興府志 卷五十四
丁彥字文博順治己丑進士授工部都水司主事督理江

南蘆政有政聲著有暇日堂集行世志

丁旭字子葵父洪夏夢歸子慕入其廬是夕生旭及長號

慕庵砥志礪行講身心實學其慮周憂世有類西山胸

中灑落有類濂溪我

朝徵修明史學使李文襄公薦之於朝書成議敘當得官念

親老不仕父母沒哀毀盡禮廬墓以居卒年七十八著

有寶晉齋初刻再刻二集明史稿志

曹爾堪字子顧勳子順治壬辰進士選庶吉士性強記博

覽能舉原委輿圖要害山川形勢指畫纖悉聽者神贊

歷陞侍講學士屢蒙

聖祖嘉寵有曹爾堪學問最優之語罷歸偕二三老友選勝賦

詩與宋琬施閏章沈荃王士禎王士禛汪琬程可則稱

海內八家有南溪集行世子鑑平鑑章有傳樵李詩繫參嘉善戈

志

魏學渠號青城順治戊子舉人授成都府推官時蜀中初

定戶口尙少民疲于差役學渠招撫緩輯定嘉眉邛雅

四州賦額公私稱便舉博學鴻詞陞刑部主事歷官江

西分守湖西道加意撫綏務從寬簡其俗生女多溺死

嚴爲之禁生全者甚衆生平輕財好施親友緩急立應

從祀名宦鄉賢 浙江通志 參吳志

周宸藻號質庵宗文子順治乙未進士由庶常改御史屢

陳時務禁旗丁勒索請清查倉穀皆切中窾要巡兩淮

鹽課罷歸擅書工詩有柿葉齋詩集 吳志

夏長泰字季保原籍華亭父嘉遇官考功郎著清望長泰

順治乙未進士授文水令輕刑緩徵得士民心擢刑部

主事請假歸布素蕭然會蘇松撫臣議築隄捍海推長

泰廉幹請視工事勞瘁卒 嘉善 楊志

陸翔華順治進士任鬱林州知州時李定國餘黨未散侵

擾諸州縣鬱林參將提兵遠出賊乘虛猝至圍城翔華

率眾登陴固守賊攻不克引去後補廣德州著有惠政

崇祀鬱林名宦 廣西通志 參 嘉善 崔志

錢黯字長孺士晉孫弱冠成順治乙未進士授池州府推

官以敏練受知臺使所至輒以自隨以註誤罷職年甫

三十家居事親盡孝暇益肆力經史百家書法追二王

兼擅潑墨自設科來登第踰七十年者史冊罕見年九

十五卒 嘉善 戈志

楊應標字勝林順治乙未進士授甯國府推官歷溧陽鄆

陵令牧劍川所至俱有惠政可紀能詩著永思堂集子

恒孫方岳舉人爾德會元有傳 吳志 參 橋 李詩繫

朱張銘字西渠順治乙未進士授行人司奉使者三屏絕

請謁典試雲南陞戶部主事會長子兆渭能文早世傷

痛卒於京邸

嘉善
崔志

顧儀字可桂歲貢生授金山衛教授沿海邊邑無廩額儀

請于上創膳堂分經課士文風聿起始登解額

曹相駿
楓溪小

志

顧耿臣字奕聞際明孫順治戊戌進士知鄆州兵燹後加

意撫綏劇賊投誠約束得宜不為州患陞戶曹典貴州

試尋督榷蕪湖秩滿知大名府釐正豪右隱糧有愚民

倡亂止罪渠魁脅從者盡為寬釋民戴其德

吳志參嘉
善文

孫榮字曙東性穎異究心天文河渠由舉人授亳州牧兵

後民多逃亡榮勞來安集墾田萬餘建巨橋十一以當

瀆蕩渠之衝轉開州築城濬河建倉修學積穀三千以

備荒歉墾田七十頃舉博學宏詞尋陞兵部郎子雯鏡

由縣尹陞綿州牧詩文俊逸著鸞嘯軒稿

顧向字羊舌辛卯舉人授四川蘆山令蘆地荒遠離城三

里即為天全董北諸土司生熟蠻雜處向竭力撫綏蠻

旣帖然民亦安輯時逆孽未靖協辦軍餉具有成績後

清田賦豁賠累集流亡葺城郭勸農宣教一以實心舉

行比歸囊橐蕭然子鼎升鼎恒至性肫篤鼎恒有傳上

嘉善
戈志

沈湛字淵伯前明諸生踐履篤實當湖陸清獻極推重稱
先生而不名慨世人浮薄殘刻無非涉險蹈危因集倫
常日用語訓二子瑤璿署名詩安清獻前後兩序之並
摘三教合一一條謂偶涉獵於神仙力勸改正立言垂
誠衛道基嚴居名五柳村著有閩游草響雪堂古文參

魚堂
文集

王睿字聖若副貢授興化通判旋陞同知時海禁甚嚴出
界捕漁者論死睿原情平反全活者眾著有曠期堂集
龔在升字聞園順治乙亥進士為蘇州推官督漕決獄摘

發奸惡請蠲版荒停修土城為三吳永利改湖廣通山
令嚴禁耗羨停薦新茶事事為民請命卒于官民皆哽
咽流涕城外山中刻有思公石以上嘉
善崖志

李振宗字欲仙康熙甲辰進士初令陝西禮縣後補湖廣
蘄水政寬訟簡士民樂業以卓異內陞歷任郎中轉平
涼府同知以勞瘁卒于官子允符舉人授什邡令有惠

政陞御史吳志參嘉
善戈志

錢霞字赤城四歲而孤事母盡孝庚戌成進士授山東冠
縣令諮訪利弊嚴保甲勤開墾均賦稅又修葺學宮興
文教改承德令兼署治中通判有守將欲徙民分戍上

陽堡百姓大噪單騎曉諭民乃帖然內陞主事

曹鑑倫字彝士勳孫己未進士選庶常典試山左所拔士

如何世堪李永紹王沛壇顏光燾王懿輩皆著清望再

主北闈試歷陞內閣學士預修 國史典訓方略膺一

統志副總裁

賜錫類堂匾額以示優寵歷陞吏部侍郎卒年六十三

賜祭葬子源祁貢生源郁源郊有傳源邦舉人雲陽知縣以上嘉善

戈志

沈辰垣字紫翰乙丑進士授翰林與纂修明史及續唐類

函羣芳譜諸書又奉

敕繙閱等韻標摘差誤謂吳興識四聲而不識七音失三韻之

原四聲為經七音為緯辨甚詳悉淳陞侍讀學士尤喜

汲引後輩乞歸卒祀鄉賢

丁策字嘉猷康熙乙丑進士為諸生時遊粵西同里蔣孝

修任奉議州判適病亡策經紀其喪并為申理錢穀之

未清者事竣護其柩歸後任昌黎令慈惠得士民心上以

吳志參嘉善戈志

錢以埏字閩行士晉曾孫戊辰進士授茂名令以才能調

東莞遷隰州牧內陞員外歷通政特轉少詹事躋清華

之列奉

命至雞林呖喇甯古埭白都納地方相度形勢設立州縣繪圖

入告擢副憲陞禮部侍郎祖楞殉難閩中瀝情叩顙得

贈卹簡本部尚書以疾乞休奉

旨褒嘉加宮保致仕卒七十一

賜諡恭恪子祭葬

嘉善 戈志

王濤字見平武進士康熙十三年隨征福建授遊擊以勞

歿於行間能詩工書不苟然諾子醅業諸生力學修行

于志

丁棠發字卓峰賓曾孫戊辰進士授新安令減耗革積弊

恤民訓俗建義學課士月給廩餼特舉鄉飲酒禮繪圖

定儀注士民始知禮讓以才能陞御史潔已率屬綱紀

肅然歸奉八十老父貧無餘貲承權菽水自號一餐居

士

吳志參嘉 善戈志

金皋謝字應台暑年喪母哀毀如成人戊辰進士授莆田

令莆邑濱海之田常被水災捐俸築隄以捍之延紳士

重輯邑乘以親老力請終養歸卒祀鄉賢

嘉善 戈志

陳霆萬字子敦康熙甲戌進士授臨朐縣邑正供四萬餘

兩向有胥蠹私收包納之弊甚至挈家遠遁累民重完

霆萬至一變其法散歸業戶使各自輸糧其弊遂革卓

薦行取病卒祀名宦鄉賢鍾之枚亦甲戌進士任義烏

教諭師範端莊儒林推重子承烈字武傳亦有文名

浙江

通志參嘉善戈志

孫洙字魯淵康熙乙卯舉人授臨湘令崇尚教化不事鞭

扑荒歲設法賑濟建啟聖祠設義塾以勞卒于官貧無

以殮眾為贈賻得扶柩歸

嘉善戈志

張王典字堯若康熙丁丑進士授山西平順縣下車減耗

費絕苞苴省差徭值歲當編審秉公釐剔從前隱漏之

弊重役之苦一時頓清陞吏部主事旋擢吏科給事中

官京七載賃屋數間僅可容膝公餘焚香玩易及卒惟

圖書數束而已

浙江通志

陳培字用楫丁巳舉人授廣東高明令發粟賑濟以恩信

招撫盜魁俾巡緝地方民得安枕粵有毒草民遇忿爭

輒服以陷人培以德化之此風遂革任十三載卒于官

著鳳覽堂文稿粵遊吟行世

嘉善戈志

孫衍字宰工康熙甲子舉人授長山知縣在任五年減耗

羨賑貧乏以病乞休邑人攀轅臥轍者相望于道有廣

川去思錄建專祠祀之所著長山邑乘孫氏宗譜等書

許湄字臨洲康熙庚辰進士知湖廣石門縣苗蠻雜處湄

開誠撫諭諸土司咸格心向化巡撫趙申喬保奏內召

卒于途居官十五年家無寸椽尺土沒後人益信其廉

子王謨王猷有傳 以上浙江通志
參嘉善戈志

楊爾德字質為戊戌會試第一選庶常歷陞掌垣條陳學政事宜深中窾要視廣東學政歲試甫周以校文勞瘁卒于官

詔卹其家

曹源郊字東牧戊戌進士以編修入直 南書房充

實錄纂修官甲辰典試貴州丙午典試廣東冒暑馳驅入闈力疾校文榜未發而歿著有桂園詩集

許王謨字端操由舉人分發四川委署宜賓令邑稱繁劇又值承辦軍需籌畫無失上官重其才簡往督築雷波

城工在萬山中王謨伐山開道觸犯嵐瘴而卒 以上嘉善戈志

孫詠字古隍順治辛丑科

廷試二甲第一故事二甲第一稱傳臚多得館選時更令以推官用及謁選而推官又奉裁授福建南靖縣知縣靖故巖邑奸民率恃險抗糧詠躬歷窮鄉勸諭民感動始樂輸將又嚴私稅之禁新學宮集諸生講經制府范承謨知其才值大計欲薦之而拘於格因先行風示為循吏勸會捧檄以事往鄰省逆藩變作不得歸

大兵入粵詠夜行晝伏至軍門將軍見制府檄且素知詠有經濟才遂題補潮州府通判丁外艱歸著有廉靜堂集

嘉興府志 卷五十四
浦文焯字元量康熙丙戌進士選蠡縣知縣地居畿輔習俗強悍難治文焯之官法令一新任九載有奇慈祥愷悌士民稱爲浦菩薩陞在定府同知甫蒞任卽擢河間府知府雍正三年直隸巡道改設按察使司卽以文焯陞授尋鐫職歸乾隆初起廢員授福建糧驛道而卒著有鶴貽堂集平恕齋文稿

孫燾字叔苟貢生善詩文倜儻負異才遊川陝賓某觀察所撫軍察公見其詩甚嘆賞延至幕使掌箋奏會山賊竊發

上諭察往勦燾請從倥偬戎馬間羽書旁午措辦悉中機宜賊聞察諸邊事皆竄伏謀欲出降而懼誅燾探知之請往宣諭單身入賊巢愷切曉諭賊感泣羅拜事平以軍功議敘選廣東廉州府同知調肇慶署廉州府知府興利剔弊所在多惠政後以耳聾致政歸

許王猷字賓穆康熙癸巳進士以翰林累擢少詹事主試江南如沈德潛楊大琛吳虎炳倪承茂皆其所得士書法力追北海片楮寸簡人爭寶之歸後與里中耆舊仿白香山故事爲尊德會居鄉謙厚與人交外和內介累官內閣學士兼禮部侍郎年八十卒

孫浚字殿揚康熙丙子舉人選舞陽縣知縣遇疑獄摘伏

如神制府調留省垣使清理積案浚斟酌情理多所平
 反保陞知州薦剡已發矣時制府威重某官素所嗔者
 因公呈議欲吹求以重其罪使浚雜治之浚竟白其冤
 制府怒人咸爲之咋舌浚拂衣曰吾不能殺人以媚人
 也遂引疾歸

顧心錯字嘉集康熙辛卯舉人父秉堅以孝廉教諭會稽
 修學校置祭器歿後門人私謚端毅心錯博學能文通
 刑名家術湖廣衡永道汪櫛以茂材薦授河南溫縣知
 縣調河內邑有溉田渠二偷注越洩爭鬪有死者爲設
 夫司啟閉挨日遞洩民無旱溢之患右族以義勇爭繼

速訟幾破家心錯使就讞於邑廟片言而兩造悅服擢

光州直隸知州光城中貫大渠北城根逼水城中地高
 等女牆民環堞而居圯則盡爲魚鼈心錯捐俸修築密
 排以石下張上斂永無坍塌患年老乞歸卒年八十四
 錢家暨字惟若康熙癸巳舉人補湖北鄭西令調南漳漳
 地遼闊奸宄竊發家暨力行編甲互保法盜賊不得發
 又捐俸修千工堰以利蓄洩民名其堰曰嘉善曰水壺
 曰彭城誌勿諉也秩滿陞中書制府奏留題授隨州牧
 丁內艱服闋補直隸保安州歲大祲盡心撫賑災黎皆
 得所後因公降補寶坻令寶坻爲鄉先輩袁黃舊治家

暨顏其堂曰景袁民有嘉善兩名宦之譽以迴避改補
山東博山令告歸乾隆甲午重赴鹿鳴宴壽八十一卒
所著有級居吟稿

朱一蜚字健沖以貢入成均時值準夷草竊

詔命舉茂材異等一蜚以宗人府丞蔡嵩薦

命往陝西軍前岳大將軍鍾琪檄令馳赴鄂爾多斯查點軍旅
糧儲器械一蜚以書生從事行間約束嚴明指揮如意
岳深器之歷署高陵麟遊令補韓城調臨潼所在多惠
政歷陞清河道擢山西布政使既又移江蘇復調畿輔
仍轉晉藩一蜚起家縣令二十年中開藩者六護督篆

者再卒以用非其人被議家中貲產祖遺田屋外無長
物也羈滯潞安當事延主起文書院講席卒

程鍾彥字驥超雍正癸丑進士入翰林改御史甫視事卽
條陳水利他如請寬換照限期添築石道以便行旅等
疏皆准行擢禮垣充河南鄉試正考官歷陞太常寺少
卿巡視西城奏請禁止附近香山一帶毋許開煤窑巡
察東漕相度運河緊要奏請添夫挑浚以收利濟實效
凡所疏奏皆見施行著有經義日纂皇華紀程南村堂

詩文集

孫惠案榜名觀茫雍正己酉舉人選授山西廣靈縣知縣

廣靈地素瘠民欠丁糧多流亡惠案力請上官仿浙西
例將丁糧移派田地起科十年帶徵得准行以妻弟朱
一蜚任山西布政迴避補山東武城知縣有民婦年六
十餘獨居被焚死往驗屋已燼屍自項以下皆焦灼惠
案密語幹役曰此縊而後焚者也急緝勿失後廉得真
犯寘之法蓋婦有姪夜盜姑財爲所識以結襪帶絞死
焚之以滅其迹遠近稱神明惠案以愛民爲心故所在
多實政比去民懷其德不忘

陸偉然字季容乾隆丁巳進士選新樂縣知縣潔已愛民
上官皆善視之獨失方伯意請掣回調簡治新樂未及
期人士有清廉敏惠之頌制軍知其剛介委署雞澤縣
事偉然坐理裕如改補高陽旋以濫應驛馬鐫級偉然
篤行力學爲文章根柢經史闡發精奧有稼墨軒詩賦
行世

陳興祚字緒三乾隆己未進士選福建仙遊縣知縣時有
泉人俞得海越獄拒捕通緝未獲仙邑林姓等七人以
疑似羅織陷獄興祚廉得其情力請開釋屢觸上官怒
堅持不撓卒如所請內艱服闋補河南洧川知縣洧故
瘠土興祚撫字得宜民有起色政尙慈惠而摘發如神
所至豪強皆斂跡他若賑窮黎新學校毀淫祠均徭剔

嘉興府志 卷五十四
蠹閩豫之民至今頌之

陳作梅字燮原乾隆壬戌進士官刑曹由主事遞陞郎中
歷掌給事中多建白稜稜有風望其任御史時條陳綠
旗營務及江浙一帶海塘事宜均得議行又有分別原
衙門注上考之奏遂著爲令巡視津漕奏運弁宜鑄給
印信及幫船更調之法俱關體要膺外擢分巡雲南迤
東道旋調迤西後以公望議事白以疾卒著有雪園小
稿

許椿字董園乾隆辛酉舉人以知縣發四川試用歷署雙
流儀隴等縣有政聲會

大兵征緬甸蜀省協供騾馬委官督解灌令沈鵬以母老病
憚行椿慨然請代上官義之調度得宜未半載事竣在
途不廢吟咏著有南征旅草二卷既補內江令值金川
蠢動定邊將軍溫福進討檄椿司正林口臺站飛芻挽
粟匪用以饒又調登春臺站六月師潰賊突至椿率站
夫力戰以救援不至被執罵賊死事聞

賜卹贈道銜賜祭葬配享雙忠祠廕世襲恩騎尉

錢金殿字鵠雲以塏嗣子髫齡能詩文及長援例選合肥
丞補江甯知縣陞海州牧擢鎮江守治有寶晉書院幾
廢矣延師集生徒資其膏火暇與諸生講論經史旋擢

江安糧道本生外艱服闋補江西饒九道署臬篆尋奉旨署理巡視南漕御史外吏得此任異數也後以事左遷徐州

守歷太平廬州以勞卒著有自信紀言靜甯室詩鈔

朱錦昌字畫圃一蜚子乙酉順天鄉試舉人謁選大理府

雲南知縣尋陞雲州知州制府以錦昌熟諳邊事奏調

騰越州州轄五關七土司土司來謁例佩刀拜跪雖品

高不稍假錦昌壽顏溫諭得悉其地方土俗并其族姓

賢否其後隴川因承襲失序擾及內地于千崖蓋達戶

撒拉撒各處搶掠錦昌與總鎮許世亨隨地鎮壓并誠

其子姓毋妄動因得無事擢蒙化同知丁內艱服闋補

大關廳同知歷署大理順甯知府所至多惠政以勞瘁卒于官著有產芝室詩集

周翼洙字迪文全錫子以選貢入成均受經義於宛平黃

叔琳受詩法於長洲沈德潛學日以進甲戌成進士選

衢州府教授弟澧字芭東兄弟互相師友以科名非不

朽事沉潛於馬鄭賈孔諸書旁通天文輿地兵農經世

之務晚尤究心通典通考二書拾遺糾繆不下萬餘條

爲諸生二十餘年庚午同兄翼洙舉於鄉辛未會試第

一以及第第三入翰林旋以親老乞歸卒

蔡以臺字季實甲子順天鄉試副榜考補景山教習以知

嘉興府志 卷五十四
縣用不就庚午舉順天鄉試丁丑冠南宮

廷試第一授翰林院修撰尋補

日講起居注官以親老乞養歸以臺自幼穎拔好古博通羣籍鐘鼎圖書金石之品寓目卽辨真贗生平著述多不屬草僅存姓氏輯略六卷

朱鑑昌字宗盛四歲而孤性聰慧及長益倜儻不樂爲經生業援例選縣丞分發楚南尋補通道令改發四川值金川肆逆軍需旁午上官委鑑昌督役修日耳拉山路兼總兩臺甫題補漢州牧以積勞成疾卒

金汝珪字同侯父華文行重一邑乾隆壬辰成進士授吏

部文選兼考功司主事尋丁母憂扶柩歸葬時南陽夏鎮間河水驟溢狂飈陡起船欲覆家人掖汝珪將呼他舟載汝珪抱棺痛哭不肯去服闋由郎中擢江南鹽巡道在江南五年累署藩臬儉約自持未嘗一召優伶演劇被議歸卒年五十一

謝墉字崑城乾隆辛未

召試一名授內閣中書壬申成進士入翰林歷官工部侍郎三充鄉會試同考官兩主鄉試兩任學政兩知貢舉一充會試正總裁墉以文章受

知遇甫入詞館卽

命上書房行走出入三十餘年其歷掌文衡積學之士多出其門辛丑狀元錢棨鄉會榜首皆壻所取爲

熙朝盛事後被議降編修仍

上書房行走以疾卒京邸嘉慶五年

上以師傅舊臣追

贈三品卿銜并祭葬著有詩文集書學正說等書

曹焜字素爲乾隆癸未進士選四川新都令疏堤堰以溉田疇均驛站以安夫役民咸便之制府阿爾泰奏調成都兼署華陽以卓異薦歷署嘉定雅州潼川諸府事兩金川逆酋蠢動隨制府桂林專治文書嗣被吏議革職

留任調赴定邊將軍明亮軍前奏開復改授員外郎金

川方略館纂修官以繼母年老乞歸養里居十餘載卒

王啟焜字東白以新江例選四川大竹丞擢成都令時

大兵進勦金川羽書旁午擘畫悉中窾要陞簡州牧尋遷瀘

州牧權守夔州大吏咸倚以爲重旋擢成都守晉川東

道廓爾喀軍興檄辦打箭爐軍需轉輸迅速大功告成

賞戴花翎值川匪滋擾總籌軍務以勞卒

以上伊志

朱潮字學瀾以貲郎爲府經歷洊升長沙府知府攝靈壽

縣時遇水災典質以賑母錢亦脫簪珥助迨官福建署

福甯府值海寇蔡牽於三沙爲巢潮乃察地勢練民勇

購獲賊黨悉牽踪跡出奇搗巢未幾殄滅補淡水同知

治民番械鬥率勇直前宣布威信經年而平

新纂

程廷泰字西泉乾隆甲寅舉人就江西布庫大使嚴禁牙

行私秤校準印烙商民稱便尋擢刑部郎中有婦被火

死同官將嚴治其子廷泰諦視形迹研詢親戚供稱母

子本無間因坑火延燒睡酣不知逃避子在別房聞聲

奔救已遍體焦灼哀號莫及案定子得免

見魏塘人物志

程廷濟字悅舟廩貢生由方略館議敘得江西臨川縣丞

升浮梁知縣訪獲鄱陽湖盜鄭萬年洪四保等置之法

景德鎮兩大姓聚眾械鬥單車往諭即時解散丁艱吉

補直隸曲周增堤防廣書院士民沾惠調署良鄉擢雲

南鄧州知州引疾歸

見魏塘人物志

陳孝泳字賡言號松崖以婁籍補博士弟子員後歸原籍

精篆隸金石乾隆丙寅詔修西清古鑑冢宰汪文端薦

叅預討論壬申中順天舉人修書成供奉懋勤殿授

國子助教累遷至陝西道監察御史晉授光祿寺正卿

參曹文植撰墓誌

陳祁字如京號紅圃由謄錄議敘得邵陽縣丞升臨潼令

值教匪不靖生擒首逆李貴誠歷陞甘肅布政陝甘總

督賞戴花翎積勞成疾制軍那彥成爲繕墓誌深致

慨焉著有從戎草南國雜詠新豐吟稿商於吟稿尤散

本誼叔祖孝泳欲創義庄不果祁與堂叔暲贊成其事

楓溪
小志

孫銀槎字階青乾隆丙戌進士歸班選山東濰縣引 見

改安徽績溪其為治以端士習為先分校所得皆名士

請加學額邑人有澤留巖序之頌 見魏塘
人物考

范寶璵字六泉乾隆庚子進士部選山西山陰縣引 見

特改四川嘉定縣并 賞給紗袍褂時教匪方熾檄督

兵節稱職歷署石砭同知嘉定府知府調赴西藏管理

錢局藏俗親死不葬教之殞殮又畏出痘有患者輒委

棄致死為設痘局居病者醫治之仕至湖北蘄州知州

著有古品節錄行軍須知駐藏識略 新纂

錢樾字撫棠少時器宇端重讀書過目成誦喜作擘窠大

字乾隆壬辰翰林累遷吏部左侍郎坐失察銓吏降編

修復累遷內閣學士兼禮部侍郎嘗主試陝西江西又

督學四川廣西

召入

尚書房行走于役江西之歲

睿皇帝方在藩邸製詩寵行有冰心玉衡句嘉慶元年督學江

蘇先是蘇有獄連諸生懼羅織樾會鞫得雪所全多知

名士會徐州壩工火又瓜儀鹽臬盤據為閭閻害

上命密訪二事樾指陳利害本末甚悉歲辛酉畿輔大水疏請

以工代賑又請禁南漕折色諸弊乙丑督學山左戊辰

丁艱回籍服闋患病屢蒙

溫諭問疾無虛歲甲戌力疾覲

闕以江南番錢盛行奏請嚴禁其所歷半天下熟悉民間利病

知無不言里居未嘗有干謁地方官事年七十有三卒

於家于志

陳蘭徵字香王乾隆庚辰舉人銓廣西永淳令署橫州時

山水驟漲民多登城避溺蘭徵立發倉按丁口分給民

賴以安水退為脩城垣三百餘丈署懷集縣邑素健訟

蒞治甫三月刁風頓息時值邊西荒歉上官知其恤民

瘼仍調橫州蘭徵立請出倉穀五萬石官為平糶全活

數千餘人後官至山東濱州知州引疾歸卒壽七十有

九著有粵遊吟二卷樹香齋詩集六卷于志

吳書城字擁萬嘉慶戊午舉人由中書入軍機陞戶部郎

中補貴州遵義府知府值大旱米價騰貴飭各屬開倉

平糶並諭殷富量力捐賑治無飢黎擢貴東道兩署臬

篆凡遇重獄必反覆再三以勞卒年五十六生平事親

孝自以祿不逮養為終身恨與諸弟歡好無間有詩古

文彙各二卷筆記八卷撫苗事略一卷于志

周以勳字次立性倜儻有幹濟才乾隆丙午舉人補山東嘉祥令萊陽勢豪因爭麥場曠羣奴斃其人正兇不得檄以勳會鞫廉得之將定案而勢豪內控

欽使來按獄以勳反覆辯論卒抵勢豪罪後以姻親迴避改江蘇委辦丹徒賑務周歷城鄉勸捐二十四萬餘兩活人數十萬計任寶山時捐廉堵築海隄悉臻鞏固陞海門同知旋署江甯知府以勞瘁卒於官于志

錢清履字慶徵以埏孫乾隆甲寅舉人官蘄水縣時嚴斥喉清戶糧進邑中子弟教之如家兒而發奸摘伏不稍

姑息膺卓薦陞白河口同知年踰六十告歸居家十有餘年邑中官紳重之每有疑難得其一言以決平生喜為詩有松風老屋詩稿十六卷詞二卷于志

倪景點字檢之由安徽府經歷陞至順天府治中服官四十年所在皆實心任事而於西隆煙瘴要地尤多德政州人至今思之于志

周升桓字穉圭乾隆癸酉同兄鼎樞舉於鄉甲戌同父翼洙成進士入翰林擢侍講外補廣西蒼梧驛鹽道粵產斷腸草獠民遇忿毒人死歲常數百計升桓令犯笞杖者納草以贖罪不數年根株絕慘毒之獄遂除又獠民

自燭禍大吏疑土司勾結欲坐之罪升桓白其寃調土
 司征之戮其魁釋餘黨其他鋤奸釐弊雪枉決疑類如
 此旋署臬篆以事呈議繇成在臺供應臺站外惟課通
 鑑摹古帖凡六年如一日歸里後長鍾山書院卒年六
 十有九書法宗顏詩清婉有晚遊詩存子以輝由通判
 籤發南河官至河南開歸陳許道旋署臬篆所至辦理
 河務有政績以疾乞歸廉俸所贏並助親黨喪葬于
 盛堂字素園少端重乾隆甲辰成進士選四川長甯令邑
 故有健訟風甫蒞任即嚴訪訟棍每訊案隨判隨結由
 是四境肅清後因公呈吏議生平褐衣蔬食課子弟極

嚴家居未嘗有干謁地方官事年八十六卒于

志

周以忻字亦次嘉慶戊午舉人宰河南偃師課農桑興文

教有令名陞雲南甯州引疾歸居家孝友工書翰于

志

王煥字中照少有膽略官四川萬縣丞嘉慶初川楚教匪

滋事經略勒公調赴營理軍務煥擘畫悉中窾要子培

字陞升四川百丈司巡檢時亦隨營數帶兵戰殺賊魁

升雲陽縣知縣加知州銜以丁母艱服闋任貴州普安

直隸同知卒官于

志

陳鵬字翼雲官貴州州判從征逆苗署定番州事會鎮戎

統援兵到州鵬獻奇計敗賊於廬山凡殺苗一千二百

餘人官兵死傷者二人鄉勇七人而已時制帥抵貞豐設軍需總局於安順府飛檄購備軍糧接濟貞豐一路鵬不惜重貲分路購辦又於沿途各站分佈丁役陸續起運先後四月餘凡運米六千餘石又署普安州時有巨猾陽黨中者本州民久於滇結黨羽至十餘萬欲謀不軌嘉慶十五年潛回州境將取老幼赴滇尅期舉事鵬方抵任聞之遣偵其家則已束裝秣馬待旦行矣遂選集兵役乘夜直入擒之明日制府差官帶兵至卽以授之後升興義縣知縣官至廣東連平州知州望吏議鵬級歸著有萬里蚤吟一卷卒年七十

于志

黃安濤字霽青父凱鈞入孝義傳嘉慶丁卯舉人已巳傳臚授編修丙子出典貴州試差旋充文淵閣校理與修一統志文苑傳尋除江西廣信府艱歸服闋補廣東高州府調劇改潮州初涖高州俗好訟多積獄乃檄屬州縣書兩造兩辭揭通衢約以期自至暮獄平以千計潮人好械鬪殺傷事發市人代抵名曰宰白鴨前守利易了率不復窮治安濤思移俗獄上輒語囚曰若但勿承毋他慮我養若衙中獲犯而後釋以故終其任未幾一代抵者屬吏成案懲失入多駁詰怨望所積浸潤達上官卒坐督捕疏懈被議改簡罷歸與諸文士詩酒往還

有真有益齋文集詩娛室息耕草堂詩集又著說經中

義一百卷權濟錄綠箋詞鈔昭代詞選嶺南從政錄

沈日富

撰墓志

鍾汪杰字元甫嘉慶丙子舉人丁丑進士分發山西授壽

陽縣歲值水旱蝗蝻後籌積儲勸墾荒作歌剴切民感

化馴復繁庶杰天資高妙學易頓悟故言性宗新建之

說然博覽經史洽聞殫見不為心學空言所著遺書有

二十一種詩集名小網川書屋

新纂

浦曰楷字端培號又垞母沈氏嫻禮教善吟詠有身時怡

情蕭選生日楷讀書過目成誦漢魏六朝文若夙習然

嘉慶辛酉舉人丁丑成進士館庶常散授山東萊陽縣

清積案嚴保甲創設書院興國寺為祝釐之所捐廉

重葺並脩宋琬安雅堂會大旱禱雨輒應冒雨捕蝗卒

有雙歧之麥道光戊子保舉卓異旋調滕縣聞治萊陽

有威名猾吏斂迹地素產煤掘者半亡命挖過深一壓

斃數百人嚴禁之祇存一窑供日用修上宮館肖孟子

像其中吏治儒雅政聲方著以肝疾告歸著有自怡齋

文集晴蘭書屋詩稿

浦氏行述

孫成彥原名鈞號廉甫嘉慶癸酉優貢考取八旗教習以

知縣分發廣東署龍川有江西定南民人與龍邑人爭

婚埋滅七命之案盡心究辦不兩月屍犯盡獲各補博羅籌賑水災有政聲權南雄州仁化巨盜蒙叫化等出肆焚掠成彥故弛捕限密伺不備掩捕之盜駭戒毋入境再任博羅平反盧某械殺命案旋獲正犯前議抵死者十餘人得雪英德匪首鄺亞清等嘯聚拒官兵宰英者孫福謙求退大府命成彥往匪聞旋解散嗣西匪竄入躬冒矢石馳往黃茅峽百花巖干段石等處追剿將密保擢陞遽卒

新纂

查奕照字丙唐講求經濟年少館京師侍郎琅玕宅琅赴浙聘掌章奏時值英吉利入貢與當道渡海觀蓮花橫

首諸洋卽欲有所設施偕海甯牧張玉田轉餉甘肅遇張漢潮匪警居圍城匝月策守禦阿林保督閩浙專弁來迎適海寇蔡牽朱潰勢方熾策以絕接濟援擄刼截剿躡擊諸法寇得撲滅百齡督兩江威望嚴重權令鞫獄有劫庫賤官案捕者以難民三人當之具白其無辜百督始詰責之繼器重之歎謂渺小丈夫乃能以氣節抗上官後隨慶保撫黔條奏運銅虧帑之苦部格於成議再駁再奏並請

欽使會勘遂邀

特允慶

陞督兩湖楚省例食淮鹽而永州逆流挽運寶慶鄖陽施南在萬山中道險難至爲稿奏請改引界議雖寢民

感之通山鹽梟拒捕戕官梟遁強獲二民人背有刺字者實之獄上疑有冤力勸慶率司道會鞫卒得雪修脯所入援例官通判進權淮安同知值河南潰決工繁帑絀部議按田派夫預征雜稅爲條陳不可狀請借提淮商引費卒如議行既歸里與嘉興張廷濟同邑黃安濤相友善往來倡和尤超然塵壒云所著東望閣詩鈔及隨筆行世其未刻者南北史小識敬業堂集註藏於家子世璜善畫工詩

參汪能肅撰傳

陳傳均字衡甫號皋蘭祖作梅宦歿雲南襁褓自滇歸貧不能延師稍長知苦讀母鍾呼使罷始就寢年十三補

博士弟子員娶妻十八日殂終身不復娶中嘉慶丁卯鄉試第一甲戌入翰林散館授戶部主事陞郎中道光初西陲用兵指撥餉需司農著績京察列保一等尋以失察降官遂南游楚爲制軍琦掌牋奏巡撫吳榮光器重之遂主講蓮池書院啟迪多人氣度和平雖御臧獲亦無疾言遽色以耆壽終

郁鼎鍾字彝齋道光丙戌成進士入詞林散館授江西泰和縣知縣甫下車卽懲蠹吏飭法者有宿盜案廉知退役某能召之跣緝卒獲寘諸法聽訟以誠感兩造各愜意而去邑有萃和儲英兩書院捐俸獎勵文望翕然時

粵東有兵事邑當孔道供億煩仍紳民喜其廉而無擾
集資相助差畢悉以廉俸償鼎鍾性冲澹苦案牘勞形
遂乞休貧不能歸贛州守王藩重建陽明書院適落成
聘主講席在贛五年教有程式士風丕振歸鄉後足不
入城鍵戶著書遠近從學者踵至著有平川舊聞心香

閣詩鈔彝齋文集平川詩徵舊聞識餘校補袁氏紀年

顛編注釋王脩竹論畫詩

上海賈履
上撰傳

錢寶青字萍瓦內閣學士樾曾孫幼岐嶷能文章道光辛

丑成進士由戶部主事荐擢至宗人府府丞仍在軍機

章京行走一典湖北鄉試一充朝考閱卷咸豐七年京

城鐵錢壅滯條陳疏通八年俄喚欲派員駐京桂良花

沙納先與照會允准然後奏聞寶青疏摘原摺有駐京

是否另有詭謀實不敢信等奏則是姑為是請以貽朝

廷憂他日准行之害君相任其咎而彼已先事聲明其

立足不為不穩應請宸衷獨斷應剿應撫悉歸僧格林

沁督辦桂良等立與罷斥九年奉詢湖北軍情歷陳官

文胡林翼和衷濟事規畫四路進兵誘堅守之賊使之

野戰復沿江躡擊俾疲奔命楚軍成敗視林翼去留為

轉移毋任撫臣以奪情為不安許離署任言中機宜悉

嘉納之仕至戶部右侍郎都察院左副都御史

節錄
國史館

傳

謝字澄字石雲由廩貢議敘任甯晉縣淳沱河水溢設筏救民無算西陲用兵轉餉有功保陞知州後因盜案被劾歸工詩畫著有傳雅堂集新纂

曹銜達字子安善記誦卯角讀時憲書三遍覆不遺一字年十二九經三史已畢酷好三蘇文謂老泉峭潔東坡橫厲樂城容與我欲合而一之初入試文無破承某邑宰大駭黜之繼同學示以式笑曰易耳逾年再試遂冠童子軍旋食餼道光戊子北闈南元癸巳進士以知縣用簽發福建時閩中方苦旱大吏屬僚屬撰禱龍王廟

文伸紙濡墨詞成典博懇切某中丞才之遂徵節知邵

武縣事決獄引經準律翕然有聲旋署知府卒任所新纂

盛錞字瘦金廩膳生道光登極 詔舉孝廉方正邑人舉

瘦金應後中壬午鄉榜太批分發河南知項城縣事有鄉民以開堰細故感堪輿家言訟案久懸錞履勘諭曰地理六經首郭璞及身不善終且無後其難憑可知况今開堰灌農田普獲利遂呼民壯畚鍤之民理屈不復辨有同族爭繼殤者執曰殤不立後產宜瓜分折以禮經爲殤者以其服服之衆議阻決案坐堂皇戒役勿辟人將定讞問衆曰合理乎否則言毋隱聽訟悅服稱賢

父母歸田後質樸率鄉里婚嫁勸勿從奢後進衣冠不

正不敢侍其側新纂

孫正錯字雲補中道光壬午舉人以知縣分發四川歷署

清溪新津榮縣射洪夾江補鹽源升成都府同知貞幹

廉明所至有政聲尤善讞獄疑不決者皆平反無枉不

事刑求民以情告罷官家居足迹不入公門孫氏誌狀

孫爾榛字酉山歲貢生幼不好弄祖兼金病足淹牀蓐父

汝蓄咯血均侍奉寢室竭誠事湯藥甫入小學習楷法

兢兢點畫程子所謂卽此是敬之意已能領略長敦內

行家庭間片語怡然中理便消嫌隙交友偶訂言誓不

更易艱窘忍饑一二餐緘口不稱貸授徒督幼以少儀

範長以文律敝衣蔬食躬行示儉經造就者知爲西山

門弟子也光緒紀元邑人公舉孝廉方正感然曰名實

之間克稱爲難卒時太息猶以無裨名教爲憾云新纂

章裕善字竹虛性孝友方介道光甲午舉人大挑以知縣

分發江西咸豐三年署吉水縣值粵逆竄金陵江右戒

嚴裕善練勇守禦五年賊圍郡城分擾吉水登陴固守

自然礮擊賊賊已緣城而上十一月朔城陷裕善章服


坐大堂濡硃筆書案上曰勿傷吾民遂遇害事聞

旨優卹子雲騎尉世職新纂


馬世鑑字衡齋邑庠生授徒自給庚申粵寇至城陷趨詣


明倫堂正冠巾自經於齋房

新纂




嘉興府志卷五十四





70008569



馬世鑑字衡菴昌慶生歿徒自給庚申舉冠至城治題詞
鳴倫堂正志中自經於

